

春融堂集

和16
890
16



春融堂集卷五十七

青浦王昶德甫

墓志

含山縣訓導蔡先生墓志銘

先生蔡氏名瓏字文舟世爲江南崇明縣人遷于崑山先生自弱冠則已補蘇州府學廩生從何義門焯張岳未景崧游以是益有聲庠序閒先生居崑山茜墩茜墩東距嘉定之安亭四十里稍北與亭林相接安亭故歸震川太僕所居而亭林者顧處士炎武生于此兩公流風遺行茜墩人往往能傳之故先生之學私淑于兩公爲多先生爲人質慤寡嗜慾教人以盡理敦誠樸躬行實踐讀書好古爲宗其輕儇巧黠者雖敏悟必以夏楚收其威望之色粹然聽其言訥然爲文古



澹質實如其人自茜墩遷于青浦之珠街里從游日益衆學
官弟子稍知名者皆經其指畫講授然屢試不遇卒以歲貢
生任含山縣學訓導先生在含山益以師道爲己任又聚諸
生而講學焉其諄懇深至聞而警服警悟痛自刮磨湔濯者
不可勝數嘗與諸生讀後漢書范式傳迴翔循誦聲哀厲至
于泣下有諸生魏某在坐忽起而揖曰某與某生夙相好也
以田故將訟諸縣官今聞古人行誼如此自媿且悔遽出訟
牒于懷壤之其至誠感發人多此類也先生曾祖某祖鈐皆
不仕父廷傑某縣學生配孺人張氏子一照新陽縣學生女
一適崑山縣學生郁郁文先生在含山五年教大行以年老
告歸歸六年乾隆丙戌三月初九日未時病卒于珠街里距
生于康熙乙丑某月某日年八十有一蓋自先生歿而東南

敦龐耆碩之士盡矣是年十一月照奉其柩窆于長洲縣之
觀音山祖塋南若干步以予受業于先生久知先生行事爲
詳使銘以刻諸幽銘曰
伊古勸學必以道俱輦悅其文儒術乃渝維此歸顧百世之
模述其微言湯頌訂愚弗耀而窮云何其吁先生之教在誠
中孚我斲銘辭敢失以誣

歲貢生陳先生墓志銘

先生陳氏名麟詩穎傳其字江南青浦人祖玫玉父朱紱皆
不仕先生少敏悟及爲博士弟子歲科試必冠其偶是時曹
給諫一士未第聲望與先生等福建鄭公任鑰由檢討視學
江南以知文自矜許比至松江入學舍召諸生使前曰孰爲
曹一士陳麟詩者兩人則各以名應鄭公曰我知若等久矣

若等負時名各不能下我固知文者今當爲若等定次第若其勉之及試先生第一而曹公名乃第四頗慚鄭公曰若毋以漸爲也若等所業不相上下今殿最益偶然耳然曹生不久當達陳生恐以諸生終後皆如其言先生爲文不騁才不驚氣取題之癥結肯緊用十數語抉剔而縷分之灑然劃然能警發人耳目心志以是試輒利經其指授者童子必入學增附生必餼廩以是從遊者日進先生爲人閒靜晚年益務爲和藹寬厚借人語煦煦然與之交者數十年未嘗見有愠怒憤激卞急之意生平寡賓客經歲不出門講學暇輒取少時所習排次溫繹終則復始日以爲常至老而不易乾隆壬申十月十七日以疾卒于家年七十有八子二長鳴雍縣學生次某孫若干人以戊子某月葬于章堰銘曰

爲天民與天游孰屯其亨弗以憂也言恂而謹行溫而恭匪強飾之德符充也後有過者其式幽宮也

寧國府教授施君墓志銘

乾隆丁酉十一月教授施君以疾卒於里第閱月訃至京師子朝幹方以禮部郎中牽連涉吏議頃之事白始得奔喪歸葬乃排次行狀屬余爲志墓之辭按君名淇衛濱其字別字竹泉世爲江蘇儀徵人生平肆力於學自五經左史迄于唐宋大家誦集鈎索貫串一發於時文數試弗遇卒不屑詭隨從俗乾隆丙辰年五十有一始舉於鄉又三年己未成進士例得縣令君請於吏部就教職癸亥選寧國府教授學官之職不舉久矣往往媿嬰洩忍求悅於博士弟子教日以凌替君至則噉羣弟子而訓之曰若知寧國先賢以風節稱者莫

春風堂集卷五十一
如陳沈壽民乎凡立身行已當跡此以文章著者莫如
劉太沖梅堯臣乎凡爲文若詩當跡此羣弟子尊而信之畏
而服之從其講習者卓卓咸有成就如胡元義袁穀芳張燾
多有聞於時甲戌請告歸里來學者益衆黽竄講畫竟日夜
弗倦而有司請見弗能致是以四方益重其學而敬其人君
優游里門頤養樂志凡二十有五年而後卒卒年九十有二
者年碩德世以爲難曰善者曾祖也曰取益者祖也曰銳者
考也皆贈文林郎晉贈中憲大夫禮部郎中三代皆不仕至
君始以儒顯先配王氏繼配程氏有子三長詔乾隆丙子舉
人石埭縣教諭仲朝幹癸未進士歷官禮部郎中季朝榮邑
廩生以某年月葬某鄉之某原朝幹自傷宦久養不能致其
樂病不能致其憂比其聞喪問故而適以牽連對簿於見星

而行見星而舍之義有弗克伸也是以創鉅痛深迫於無可
解雖然朝幹有文章名在郎署爲公卿所重爲

天子所知區區仕宦之浮沉得失於孝子潔白奚損焉使君
有知亦可釋然於地下已矣乃循其請而作銘曰

自施著姓代有閩人常也起曾進于聖門讐也演易傳於王
孫張胡之學蔚其紛綸以迄士而箋注是敦通詩春秋厥德
肫肫博士助教凡十九春嗚呼先生惟繼其醇琢彼珣琪與
時爲珍旋辭簪紱曰歸江濱鼓徵莛叩手畫口陳河汾之盛
不召而臻伊古經師受福孔殷以德以壽以子以孫尺蠖所
屈其究乃伸於傳有之匪我謏聞謂余不信眡此勒文

金壇縣教諭葛君墓志銘

乾隆丁酉十月二十日金壇縣教諭葛君以疾卒于官疾初

春融堂集卷五十一
四
亟邑之薦紳大夫暨博士弟子來視者日相屬於道又爲之徒跣走數百里延醫以視暨卒士大夫來弔者益衆會哭皆失聲及喪還男女夾道聚觀嗟嘆有泣下者比十餘里不絕於時傳以爲異蓋君畜道德而能文章愛人才勤考課時訓諸弟子以聖賢行己之義與夫詩書六藝之指其逞小忿憲告訐者導使自悟不忍遽麗諸鱣撻是以身歿之日感人至於如是也生平事親孝居喪以盡禮聞遇忌日嗚咽掩抑終其身奉繼母庶母如所生弟昌咸早歿遺姪二撫而教之兄弟七人合爨而居易衣而出內外數百指無閒言遇族人朋好之喪躬自料理死者葬生者育孝友仁愛蓋天性然也少從曹給事一士諸名人遊作文咸有法度雍正八年爲縣諸生十一年補廩生乾隆九年順天鄉試中式時

上方幸貢院賜中式舉人五經各一帙君與焉二十六年吏部揀選將以知縣用君念張太孺人年七十餘不可遠宦遂改校官四十一年某月授金壇教諭在任年餘卒年六十有九君名恆字繼武別字晴溪世居吳縣洞庭東山諱之令者曾祖也諱士位者祖也諱國琦者考也以 覃恩封贈文林郎如其官曾祖母賀氏金氏祖母張氏妣陳氏張氏 贈八品太孺人配陸氏無子以姪啓仁爲後女二一適今翰林院編修嚴福一適監生姜桂亦先君卒嗚呼君以名孝廉懷文抱質垂暮始獲一命又不踰年而歿顧勤于其職不以冗長自廢使多歷年所所裨于學校如斯而已歟使君有社有民設施又將何如歟宋元之季老師宿儒若何基張頌之倫多戢身息影託教授以淑其邦人子弟君亦猶是意歟歐陽公

言施諸身不見於事可也君父何所憾歟惟是君既不大顯於世矣無後且殤其女蒼蒼者果不可問歟宜賢士大夫及行路之人皆爲咨嗟出涕也某年某月葬于某縣之原編修君實來請銘編修之子余甥也實葛所自出聞先生行誼甚詳乃銘曰

豐其德報何嗇也匪報之嗇俾爲世則也

誥贈朝議大夫縣學生賀君墓志銘

君賀姓諱廊佐涓占其字別字章溪其先由江南鎮江府遷於湖廣遂爲鍾祥縣人祖諱運清順治丁亥進士以吏部郎仕至福建興泉道父諱某歲貢生君年十八補縣學生學使繆公沅嘉其文器之旣長適江南從張日容大受儲中子在文錢亮公名世諸老宿游學日進有聲於東南然好閒靜工

琴書畫蘭竹爲文清峭澄澹如之緣是屢試不遇弗介意也性和厚於孝友睦姻任卹尤敦先是塋墓在荆門置祭田以供祠祀度其用之仂而振諸貧者諸母守節皆具其行以上於當事烏頭綽楔相望也家僮二三百指服役久則折其券而遣之生平無疾言遽色里中人咸敬畏焉有狗屠無賴少年方門狠望君來走匿君召使前喻以枉直利害乃感激搏顙而去君長子今太守君官於滇貽書勗之曰爲仁吏毋爲能吏惟審民疾苦而拊循之及兵興君復貽書曰邊事至重大必夙夜黽勉以稱任使毋憶家母以我衰老爲念比君之卒太守君方由同知擢永昌府知府總督明公德請以縗墨從事 詔許之時軍書旁午太守君處分部署咄嗟立辦自出師迄振旅事無留滯叢脞者人謂太守才皆君遺訓也君

生康熙丙子歿以乾隆戊子十二月甲子年七十有三以太
守貴 誥封奉直大夫晉贈朝議大夫配李氏贈恭人先君
十二年卒子二太守君長庚長也次由庚縣學生女三適王
鐘遵熊苞李融孫二人某年月日將葬君於某里之某原太
守君遂以狀來請銘刻於窆銘曰
爲幽人爲碩士止諸躬晦於世乾乾積以翼子荆之山漢之
水若堂斧封於是固且安利從祀

誥封中憲大夫中書科中書舍人劉君墓志銘

舍人劉君源溥從余游十餘年爲人恂恂然語訥然如不能
出諸口其文則淵懿純粹不以雕刻藻彩爭工余嘗詢其所
自蓋得於祖父之彙訓爲多今乾隆五十六年距其祖象山
君之卒已二十三年矣舍人父世祿將奉府君暨配林恭人

葬於某縣老雅坑之原而舍人奉其狀以來乞銘按狀君生
而聰敏刻苦讀書文章汪洋恣肆皆本經術補縣學生督糧
道潘某奇其作令讀書粵秀書院院長編修傅王露尤愛之
未幾以選拔貢入京師 朝考列高等授中書科中書舍人
舍人內閣大學士之屬職中外百官封贈誥命直廬在午門
外與六科給事中相次故世目爲內府云君素 舍人
欲封生母不及於適奉厚貲託當事求君請出同 舍人
却之由是大學士知其名令協理漢本堂事既俸深 舍人
任時兄某亦爲金華府同知得家書聞父母病遂與 舍人
乞養歸其後母卒君哀毀盡禮父卒如之故世稱其 舍人
之伯子起鯤選授刑部郎中勗之曰明慎用刑哀 舍人
古難之必以無負於 舍人

君者無負於親也嗣以配林恭人歿遂不復出建宗祠於邑中取弟姪之貧者撫卹之又表章遠祖隱德於志乘遇邑大事輒首出貲身任其役鄉里稱為善人嘗歸自京師過彭澤舟覆若有神掖之以出四僕亦無恙人謂善人之報也君諱濤字鼎文一字象山自宋遷於廣東香山縣之谿角鄉曾祖元錫祖某父某皆不仕生康熙三十九年某月某日卒以乾隆三十三年十一月十二日年六十有九兄弟二人君居其次 敕授內府中書科中書舍人復以子起鯤晉封中憲大夫刑部山東司郎中配林氏慈惠節儉有士行先封孺人繼封恭人子七長即起鯤次世祿是為舍人之父三起聖四起鯨俱先卒五起鯨候選州同六琮縣學生亦早卒七起鳴女二俱適士族孫源溥乾隆五十一年順天丙午科舉人即舍

人也源浩工部司務源澂選拔貢生源沼學基源沛倫皆縣學生嗚呼盛矣先是君之喪偶而不出也購宅於縣城南挈子孫延名師以督課之其後皆能覃研學術胚胎前光觀舍人之文行與其餘子姓之蕃衍如此是君雖未大顯於世而遺澤長而未艾斯可銘矣銘曰

君在 朝著簪筆垂紳敢以苞苴玷此絲綸君居鄉黨散財發粟建我祐主用合邦族匪惟卹之又從教之子姓振振蔚其鳳毛雅坑之築既崇既固刻辭幽宮庶示千古

文學楊君墓志銘

松江有獨行士楊君之灝兼以文學著於東南乾隆五十九年歲暮泣而來請曰之灝在門下久先府君生平大畧常舉以告矣某不幸乾隆四十二年春府君歿於涼州迄今閱十

有八年而先孺人又歿某等弟兄將以明年正月初七日合葬於奈山之某阡謹撰行狀惟夫子哀而銘之按狀楊氏自鹽官遷於松江君諱世淦字紹曾父建周母沈氏少孤撫於兄作霖所釋服爲華亭縣生員明年補廩生又明年就同書王氏爲贅壻數年連得丈夫子四常呼至膝下辟咥而詔以不逮事父母爲戚而王孺人亦自恨其不克見舅姑也平日授徒教子與針黹紡織交相黽勉者凡二十年屢困於場屋赴順天鄉試復不利三十九年稔侍講承謙任陝甘學政邀之校文四十一年甘涼道魏椿年聘以課子明年卒於道署自後撫孤食苦措拄門戶孺人之力爲多君生雍正五年丁未二月初一日歿四十二年三月廿七日年五十有一孺人生雍正六年六月廿一日歿五十九年十月十三日年六

十有七子四長節之灝次樞次爾泰次爾升皆縣學生又狀云府君學究本原留意經濟所至交游多一時名宿公卿折節下之先達如侍郎鄒公一桂齊公召南錢公載編修阮公學濬光祿寺卿王公鳴盛中丞畢公沅及諸生中歛縣江君永吳縣沙君維杓山陰童君鈺蕭山陶君元藻皆有題矜話兩之集及門之經指授者每撥高第如重中則馮君孝壽汪君春容而順天魏君臺長安朱君庶武威李君汝彥尤爲表表者則其學業可知也蓋狀之所述如此之灝堅苦力學教三小弱弟皆有成立又皆爲之娶室而單獨終身比于牧犢時人義之稱爲獨行故所狀質實不誣予其來請何忍不銘銘曰

若堂若斧西奈之陽伯鸞德曜其歸其藏雲陰陰凍雪霜

颺蕭槭兮增蒼涼嗟棘人兮母盡傷詎有文而弗耀兮乃慶
有積而未彰蹇之反也困之亨也問玉靈而食墨兮占大橫
之庚庚也營幽窆於斯邱兮兆厥後之光昌也

候選員外郎李君墓志銘

上海候選員外郎誥授奉直大夫闕齋李君之將葬也其
從子大理寺右評事丙曜具書函事畧來乞爲志銘之文予
與評事同郡又曩在京師相契知其家孝友仁厚甚悉銘何
可辭按事畧君名煥字琢明號閣齋生而警敏狀貌秀偉旣
入塾師長異之年十九遭父喪哀毀動中禮節及內艱哀毀
亦如之語人曰生不能養死不廬墓何以爲人子故於窆窆
封樹悉致其力爲贈副都御史曹公錫寶所獎許兄弟四人
君第二待諸弟暨諸妹恩禮周摯婚嫁以時允敬長兄長兄

評事之父也有事必咨稟而后行後十有六年以兄弟上下
食指繁衆將別居君泣然不忍久之析產乃與長兄謀恪遵
遺命區畫所有無毫髮私厥後異居同財任兄若弟事不異
已事終其身如一日故族人悅服鄉里皆稱美之又同建宗
祠廣義田贍成黨助婚葬凡有睦姻任卹及捐賑工築之鉅
者必以身先其裨益於邑者甚大訓子弟讀書汲古毋蹈急
功近名之爲故爲博士弟子者有聲於庠序世方以鉅人耆
德期之而惜其年之不永也君爲唐建州刺史頻之後先由
閩徙浙其由浙而遷上海實始于六世祖大光贈州同諱卯
者祖也贈員外郎諱秉智者考也配陸氏誥封宜人孝於
姑相夫教子以賢淑著聞君歿于乾隆四十七年三月初十
日距生于雍正十二年七月三十日得年四十有九宜人後

十有二年而歿子三應垣早歿應墉光祿寺署正應塔廩生亦早歿女四皆適士族孫二鍾元鍾俊嘉慶十年月日卜葬於上海縣二十八保習字圩之新阡應塔附焉予考南史何伯璵兄弟孝友仁厚鄉里稱爲何展禽高士沈顛謂聞伯璵之風僞夫正薄夫厚蓋言能善世而率物也君亦如之其信可志也已乃銘曰

吳淞趨海翼以盤龍泉甘土厚卜此元宮莛其奕禩以昌以豐惟壤之吉繫德之崇後有孝義其式崇封

碭山縣教諭瞿君墓誌銘

乾隆甲寅余以致仕歸吳下始識瞿君成六並識成六之弟澂川恂恂慥慥知其爲君子焉而澂川之子中溶爲同年錢少詹事大昕婿故少詹稱許與余所見畧同其後余復以事

兩入京師又屢爲書院院長不得常與澂川相見而其謙和篤實之狀未嘗不在心目間今予以目疾久不出門而澂川已謝世中溶等將以乙丑某月葬君于天森山某都某區先期以狀來請銘按君名塘字以號涉齋嘉定人其先於南宋初由汴遷今之上海曾祖和州學政有恆始遷居嘉定南城祖某考連璧贈奉政大夫南陽府同知生子三長卽成六各兆駢季兆麟今官安慶府同知君其次也君少敏慧能文年二十以商籍爲錢塘博士弟子時錢文敏公維城周文恭公煌先後學政皆愛其才又受業于王光祿鳴盛亦推獎之屢試鄉闈不遇甲午金川用兵能助軍需輸粟者授官君以廩貢生應選訓導歷署嘉善寧波淳安諸缺後歸原籍又署靖江長洲實授碭山縣教諭庚子春翠華南巡與州縣同

辦大差蒙 恩賞荷包緞匹嘗奉檄查辦邳州水災親歷村莊撫循稽察不遺餘力胥吏不敢舞弊收棄孳埋露藪上官以爲能又江北旱上司公循視屬邑其稽查發賑一如在邳州時而縣令又延君兼主安陽書院按期督課循循化導士風爲之一變丙午七月丁巳憂歸九月丁亥憂服闋後起署昭文訓導又署元和金壇遂謝仕有別業在蘇州之閶門因家焉君事親孝在錢塘時鮑真迎養遍遊三竺備得親歡于兄弟間尤篤友于之愛性情敦樸勤于學道時取道書全集性命圭旨兩書繙閱研究居恆跣一榻終夜不寐自謂此中甚樂不爲疲倦故中年後精力強壯從未有纖芥疾居喪勞瘁始覺眩暈家居後益講求導引之術其疾漸除今年年方六十屆期親友將稱觴祝嘏君婉言曰古無此禮引先儒

程子及亭林顧氏之言謝之未幾眩暈復作遂卒蓋嘉慶九年甲子六月十二日距生于乾隆十年乙丑六月享年六十配諸孺人婉婉恭順孝于姑嫜和于妯娌慈于子婦而相夫以義其歿也以丙辰二月至癸亥十二月先葬于天森山子四長中 活監生次中溶縣庠生諸孺人出中溶好學博古尤以文行稱于時次中途中濟側室周氏出尚幼余嘗讀范蔚宗書其稱荀淑陳寔位止令長功業不顯于時而恂恂慥慥爲鄉黨所尊其後子孫皆顯于魏晉間今君既有餘德則墨食所營 苟有以發之利其後嗣必有徵也以示成六其必以余爲瞽史也已銘曰

緹其華端其質不究其施而撰其實天森之山丸丸松柏以利後人歸于其室

春融堂集卷五十八
青浦王昶德甫
墓志
循澱山湖而北折村莊罨蔥竹樹蕭森中有老屋數間風雨不蔽誦聲出金石者蔡子希真之所居也希真娶余舅陸氏之女於余為至戚又好余所為古文辭故兩人之知交日益密乾隆丁卯初冬予從義興歸過君湖上之草堂夜寒挑燈促膝相對君擷園蔬烹伏雌出湖中菱芡以佐酒酒半相與陳說古今治亂及文章得失之故慨然嘆曰吾見世之譏述者多矣顧獨好子文子文必傳於後吾他日幸而獲歿子必為我誌其墓我藉子以傳吾死且不憾矣時其妻在座側聞

春融堂集卷五十八

青浦王昶德甫

墓志

蔡希真墓志銘

循澱山湖而北折村莊罨蔥竹樹蕭森中有老屋數間風雨不蔽誦聲出金石者蔡子希真之所居也希真娶余舅陸氏之女於余為至戚又好余所為古文辭故兩人之知交日益密乾隆丁卯初冬予從義興歸過君湖上之草堂夜寒挑燈促膝相對君擷園蔬烹伏雌出湖中菱芡以佐酒酒半相與陳說古今治亂及文章得失之故慨然嘆曰吾見世之譏述者多矣顧獨好子文子文必傳於後吾他日幸而獲歿子必為我誌其墓我藉子以傳吾死且不憾矣時其妻在座側聞

君言大志數君君曰此非兒女子所知也一笑而罷君生平慨慷自負常慕辛幼安陳同甫之爲人雖補博士弟子員不屑治科舉業于古來農田水利行軍治賦之要皆爲疏通條舉抉擿其利弊見予研聲詩穿穴經故輒目笑之以爲不足學戊辰君游京師居主事凌君鎬家會凌君病卒月餘君亦歿君諱元冲蘇州府學生祖父世爲崑山人以己巳某月某日卒年三十有五無子葬于某畝之某原始余聞君之訃爲位哭之明年其柩歸自京師又泝澱山湖而往弔焉巡跡君所讀書之地凝塵翳如卷帙殘佚欲求其遺書渺不可復得爲之泣然泣下已而其妻出見曰吾夫逝矣吾夫平日獨好子所爲古文辭常以身後爲託墓中之石今在于子子其無辭亦庸以踐曩昔燈下之言也余益爲泣然者久之嗚呼余

何忍不銘銘曰

有美一人兮頎而長眼儒素兮耽縹緗思厲翮兮乘颺翔竦長劍兮鳴琳琅繫兩馬兮曰游帝鄉命忽落兮來巫陽楓林青兮歸路以長土伯九約兮譏笑而狂望故里兮心孔傷妻惇惇兮守空房練日時兮卜君之藏松楸鬱鬱兮湖波泱泱奠茲幽宮兮其永亡殃

邵珉高墓志銘

余弱冠則好爲詩古文厭薄時文科舉之學聞里中有邵君珉高能時文有聲諸生間心頗易之後二年與君相識知其內行醇謹篤于孝弟始悔曩者易之之非而願與之爲友初君之先世以富聞於時及君家業益落幼而喪父老母弱弟相倚爲命君感激讀書日夜呼憤思博取科第以昌大先人

之業顧屢試不遇又陳孺人者君之淑配也遇病早歿君由此益侘傺不得志時放于佛乘以消其菀結間常與余追往悼故被酒高歌至于泣下未嘗不歎君所望之切而所遭之不幸也君工于時文所作鮮妍妙麗後生傳寫以爲枕秘間作小詩亦清雅可喜余嘗從容往復諷其泝洄古訓毋狃于俗學君喟然長歎方欲取六經三史疏通鈎貫而已不永于人世矣君諱炎珉高其字青浦縣學生遭母喪哀毀卒卒於乾隆己巳九月某日年三十有一子一人是年合葬于陳孺人之墓而其弟瑗來請銘嗚呼以君之才使早年刻勵屏棄俗學所造必有過人者卽不然而天假之年俾得優游卒業亦將有所撰述以傳於後而今止於此君之所以傳世與世之所以傳君者將何所挾以爲憑乎抑遂草亡木卒其人與

骨俱朽乎雖然以君之孝弟當不藉詩文以爲重亦不待予文以傳志君之墓亦庸以寫余之哀思而已矣銘曰
我初識君拍張叫號有如雕鶚決起風飈既而見君弭心抑志有如脈望穿穴文史君今遠矣遺文在篋誰爲愛之以傳其業或傳或否亦有命焉我琢斯銘庶幾千年

朱上峩墓志銘

予有嶽崑孤介之友曰蘇君去疾性簡貴不善與世合獨於朱子上峩稱莫逆交恆欲介以見于余而未果未幾蘇君過余慟曰上峩逝矣上峩爲人志趣疎遠平居不問當世之務義有不可人皆拱手結舌上峩奮臂爭之必白其意乃已及人有少善則又推讓如師資以謂莫之及也與人交落落如不相親未嘗不相勉以義久之益密上峩有友曰孫聲源死

一載餘矣每言及之未嘗不流涕已登江陰之少山見其故里慟哭而反作詩以告哀其詩沉痛幽愴示予予不能卒讀也余與上峩交十年得其大畧如此至其精神寂寞超然遠覽予不能知也上峩將以某年月日葬于某村子宜有以爲銘按上峩名簡長洲縣學生父維岳用薦當爲縣令不赴上峩年二十歲以庚午某月某日病歿無子歿之明年維岳亦卒上峩疎眉朗目長身而癯好吟詠擬古樂府尤工然蹊逕幽寂所謂其境過清不可久居又其時年少學力未充沈博絕麗之文亦未及焉歿後蘇君輯其賦一篇詩四十二篇爲一卷余旣慕君之爲人恨未得與交又念其學未成將無以自見于後世爰因蘇君之請爲銘曰

往歌來哭惟是以不祿世有弔者斯其躅

羅臺山墓志

江西羅君臺山以乾隆丁酉與余定交于京師相過從者歲餘明年戊戌五月君會試報罷別余南歸已亥聞其訃又明年庚子余爲江西按察使乃檄寧都州知州趣其子之明赴南昌問故於是之明以遺集來且云將卜地以葬而請余爲志墓之文臺山少穎悟英雋絕人年十六補博士弟子墓古豪俠奇偉之行習技勇治兵家言頃之雩都宋道原授以持敬主一二銘贛縣鄧原昌勸讀儒先書乃由程朱陸王諸子之訓上溯六經論孟之旨年二十餘又受業於通政使雷公鉉公故儒者誠曰子聰慧吾懼其流也於是歸眞守約務爲實踐壬午以優行貢入太學至京師與彭進士紹升友善始以性命之學相磨切其秋中順天鄉試明年癸未還過蘇州

交汪君縉汪君深于禪悟解脫無礙臺山素習楞嚴至是遂
長齋徧讀大乘經以求所謂密因了義者既還瑞金率子弟
入山講肄導之爲善興起者頗衆尋游廣東爲恩平縣知縣
李君文藻客李君耽經誼臺山與之上下議論又於註疏小
學之書益以博而精甲午至揚州寓高旻寺時照圓貞公主
席機鋒簡捷能以片語折服人臺山晝夜參究積疑盡豁居
半載辭去渡錢塘江止奉化之西峯寺縣胥疑爲盜集衆捕
之臺山手仆三人餘駭走乃自詣縣縣令羈之同年邵主事
洪以白令乃得釋遂登天童拜密雲圓公像明年甲午渡海
禮普陀山已而至蘇州偕彭君游洞庭石公愛之憒僧舍以
居丁酉偕邵君入都都中士大夫相從問學今吏部尚書蔡
公新尤器重之明年四月得疾七月南歸余寓書于南雄太

守請主書院抵蘇州復病居數月行己亥正月歸家逾旬而
歿臺山名有高瑞金人也曾祖萬搏祖遇封縣學生父讓大
學生配某氏距生于雍正癸丑某月日年四十有六子一之
明女二皆幼往余官京師以事繁輒與臺山作夜語置酒滌
蔬果陳說生平所得于師友及貞公者時已病猶必至夜分
乃去因以得悉臺山之學於儒也宗宋五子書而羣經主注
疏小學主說文史記主裴氏張氏小司馬氏皆參稽古訓句
櫛而字比之歸于一是於釋也皈心宗乘心折磬山語錄而
禪不掩教尤以淨土爲歸外服儒風內宗梵行於世出世法
非同而同非別而別非緣而緣非相而相廣大圓滿默識其
所以然疏通證明以遏末學之悖呶排詆古如梁補闕白文
公晁文元蘇文忠宋文憲皆以通內外教典稱至於覃思構

精神悟妙蹟蓋未有如臺山者臺山素貧又家庭時時有拂逆故不能以家食人或以是恨之而臺山處之怡然其所得力可知矣之明以遺集見示未幾余遭太夫人之喪因以是集授彭君俾論次而傳之臺山爲文章陋摹擬絕依傍旁通曲鬯務抒其所獨契後世當有知之者故不具論銘曰
生也莫測其所爲逝也莫識其所歸嗟臺山止于斯微至人孰知之

蘇州府教授俞君墓志銘

君俞氏名昌言字范甄楠園號也世爲嘉定人父某監生君生而穎異經史過目輒成誦二十一歲補縣學生乾隆二十五年庚辰中順天鄉試明年會試中式以疾歸四十年毀試成進士以知縣用君請補教職頃之選蘇州府教授居五年

以疾卒于學舍君性情蕭澹高簡絕塵少多病因借脩撰秦君大成學導引符籙之術以勸尊生而繕性及爲教授謝交游掩關却掃惟與彭君紹咸脩習淨土爲業余嘗過其官舍紙窗木榻清譚相對已而出鮭菜具糲飯寒素甚于諸生然其設教也首勗以道義次甄以文章被其教者率皆名節自勵爲文亦有法度可觀其論文自歐曾而溯源於史記淳古簡潔不煩繩削而自合論詩則抒寫性情刻摹山水得之陶韋爲多君生於雍正七年十一月某日卒于乾隆四十七年八月某日年五十四配趙氏先卒無子以族子延綱爲嗣某年月日門人莊銓葬君於嘉定之某原撫其行實使來謁銘君余庚辰門下士也乃爲銘曰
大羹不和大圭不琢白賁无咎謂全其樸釋與老兼通而卒

以儒終吁嗟乎其奠此幽宮

黃仲則墓志銘

乾隆戊戌黃子仲則來受業門下讀其詩固已奇之及久與之處落落然招之不來麾之不去因以益奇其人蓋仲則師大興朱君筠君與余同年又以意氣學問相劘鏃故仲則出入於兩家無閒言庚子春余扈從南巡仲則送至宣武門外戀戀不能舍其年四月余遂奉命按察江西旋以憂歸比服闋入都聞仲則游秦晉聞而余有按察陝西之命方喜與仲則再見也及至西安仲則已赴解州遂卒于運使沈君業富所蓋距朱君之歿僅一年爾嗚呼宜予有祝予之痛也夫仲則諱景仁系出宋秘書丞庭堅自宋南渡遷居于武進祖大樂高淳縣學訓導父之炎縣學生仲則數歲而孤祖

撫以成立性穎悟八九歲試以制舉文立就應童子試知府潘君恂知縣王君祖肅皆奇之風儀玉立儔人爭慕與交仲則或上視不顧於是見者指以爲狂丙戌始與同里洪子亮吉爲詩擬漢魏樂府日成數篇時常熟邵編修齊燾主常州書院從之遊學益大進已值潘王兩君遷官杭歙仲則歷訪之又攜邵君書客湖南按察使王公太岳署中攬九華陟匡廬泛彭蠡歷洞庭獨游名山經日不出值大風雨或瞑坐崖樹下自湖南歸詩因以益奇辛卯朱君奉命督安徽學政延入幕三月上巳爲會于太白樓授簡賦詩者十數人仲則年最少著白袷立樓前頃刻數百言徧視坐客客爲之輟筆居半歲與同事者不合徑出使院質衣買輕舟訪秀水鄭編修虎文于徽州其標格固可想見也乙未

上東巡召試入二等在 武英殿爲書簽官是年入都都中
一大夫如翁學士方綱紀學士昉溫舍人汝适潘舍人有爲
李主事威馮庶常敏昌皆奇仲則仲則亦願與定交比貴人
招之拒不往也余因以益奇仲則云至其爲詩上自漢魏下
逮唐宋無弗效者疏瀹靈腑出精入能刻琢沈摯不以蹈襲
剽竊爲能詞出入辛柳閒新警畧如其詩有詩詞凡若干卷
世推以爲工仲則之至西安也巡撫畢公奇其才厚貲給之
及歿贈卹者又良厚而余與沈君交助之因屬洪子亮吉歸
其喪于武進仲則生乾隆庚午某月某日卒于癸卯五月某
日年三十有五娶趙氏子一女二將以某年某月某日葬于
某原之阡因據洪子之狀爲銘其墓以寫余哀其亦朱君之
志也夫銘曰

悠悠忽忽其以夜也落落冥冥其伯倫也朋友以爲性命而
文詞以爲精神也琢心鏤腎損天真也母之號咷也妻之呻
也子女之呱也子寧弗聞也白楊蕭蕭顧歸于斯墳也

張蘊輝墓碣銘

君也姓張諱廷璧厥字蘊輝播遐邇瀕於東瀛宅宗戚派乃
祖父澤允廸君生墮地儼駉駒足籥風雲謝羈勒猗嗟名兮
長而晷嗜古噲奇鐵三擲覃芸研奩意彌勤綴文乙乙瞰幽
闕紬元澈微疑義析劍頭可炊矛可浙蝨輪之技釋洞的劃
然而開旬霹靂斑駁雲霞綴雌霓冢書壁禮手襞績地負溟
涵鵬下擊天葩蕞蕘叩旨藹信矣畸材帝所錫餘數周髀竿
圓囂粟米有要妙綜剔靈臺發歛步星歷其蓄穰穰孕肝鬲
奮衷如雲詎嘗吃末學榦材敢角敵胡然壯歲仍伏櫪過河

枯魚退風鷓鴣糖邱酒池誓洄溺蝶羸二豪嗽餘瀝歌呼拍浮
寫悠感鏤心擢賢真已殫膏以明煎自較轆嗟君之殂日在
壁我聞撒瑟泗潛滴浮榮一瞬飄電激弗羸其躬於子覲若
芝之本蓮之蒨築是元堂割蓬藿傳芭禮魂會巫覡龜兆其
居永安適宿草陳根尚悽惻茲銘辭媿鄰笛

國子監生陸君潤之墓志銘

君諱時化號聽松潤之字也太倉州人國子監學生祖毅康
熙戊辰進士官至陝西道監察御史祀鄉賢祠父恬太學生
封儒林郎兄弟六人君最少姿性穎異為文伸紙立就時諸
兄相繼獲雋入京師儒林公遂以家政屬君君才通敏遇一
即了了又慈祥豈弟見窮民之無告者衣食之道有殫購
地以瘞葬之以是州中士大夫嘖嘖道其賢乾隆十五年

上將南巡知州趙君酉奉檄繕葺吳縣靈巖山 行宮聞君

能各以鉅工屬之目營手畫咸有端緒約而不陋華而不靡

明年

駕奉

皇太后鸞輿至山駐 蹕者數日出入延覽穆穆孜孜熙怡

悅豫悉稱

上意大吏詢知君之所為交相器重由是州有大工大役必
咨君二十年太倉歲祲邑中施粥平糶請君主之二十二年
海塘工起自劉家港至七鴉口共築土石塘四百五十餘丈
費鉅役繁知州宋君楚望亦請君司之嗣後修海寧寺建藏
經閣造北門水關石橋君皆力肩其任費節而功固同里益
無不悅服者君嗜法書名畫精鑒別常集生平所見數百種

記其紙絹詳其行款識者比之退谷江村兩銷夏錄又聚書萬卷購善本而手校讐之以貽其後裔乾隆四十四年病喘至六月某日歿距生雍正二年年六十有六配張氏子一愚卿克承其家孫三因篤因禮因儀皆以次就傳嘉慶元年某月日愚卿將奉柩葬於某鄉某圩具行畧屬余以文志其藏予昔讀常熟毛清傳稱清以孝弟力田起家有幹識楊忠烈公璉爲邑令邑有大役輒倚以辦而儲書數萬卷甲于東南是以子晉舉而刊刻之迄今經史子集汲古閣書盈天下而晉三子咸著文譽今君以好施與擅廉辦爲鄉黨所稱又憲藏圖籍書畫愚卿廣收博貯不減於子晉且以淑其三子視毛氏之祖孫何其前後同揆歟抑太倉常熟百里其聞風興起者歟蓋爲善者必昌君秉經肄雅好善樂施垂庥而錫羨則與毛氏並重於東南也固宜遂爲之銘云

如堂如斧六尺墳青烏之經古所云龍虎沙水徒紛紜要以惇德爲之根桂林一枝溫而醇越三珠樹傳清芬卜茲窆窀元氣屯隱湖婁東真同倫妥此吉壤延千春

金誦清墓志銘

金生誦清之卒也其父候補知府君傷悼之將以嘉慶五年四月二十七日葬於仁和縣之某鄉請余爲之誌按誦清名芬本安徽休寧縣人高祖某遷杭州曾祖某祖某父海卽知府君也誦清生周歲母王恭人歿事繼母許夫人孝謹故知府君憐之幼敏慧就傳讀書數行下能屬對少長刻苦力學知府君恐其勞且憊也入貲當以員外郎用顧誦清不憚酷嗜金石篆隸文字見古人遺蹟輒辦其真贗真者裝潢而題

識之尤好倪瓚暉壽平書畫摹勒鐫于石跋尾至數十通爲清嘯閣法帖餘及沈周文徵明而意猶未已也作詩仿晚唐及宋之美夔范成大諸人見者莫不稱其清絕生平未嘗與外事而遇有可疑未定者料之多中性慷慨親串貧乏厚加賙卹蓋勇於爲義又如此誦清生于乾隆三十年計其卒年三十有四娶葉氏先歿繼娶宋氏生一女無子以弟鳳梧子世煒爲後余于嘉慶二年游杭州誦清以弟子禮來見因過其所署清嘯閣者圖史雜陳爨鼎錯牙宛入雲林清閼及白雲外史之室謂雲烟供養可以怡情而樂志而不料年之止於是宜知府君傷悼不能已也雖然昌黎之哀歐陽詹獨孤申叔計其年皆及壯而卒至李觀則所稱才高乎當世行絕乎古人者而年甫二十有九詩文無一存者故昌黎云天也者不知其所惡壽也者不知其所慕今誦清之齒逾于觀而詩文幸畱于世是差足以慰知府君之傷悼已乃爲銘曰山之陰水之陽齋壯志兮終焉此藏繁石墨之猶存兮庶幾乎逝而不亡

春融堂集卷五十八終

春融堂集卷五十九

青浦 王 昶 德甫

墓志七 志略 墓碣

節母陶孺人墓志銘

陶子澍將葬其母唐孺人於某鄉之某原持其舅某所撰節母行述與自志事實介太僕寺卿倪公請銘於余時余奉敕編通鑑輯覽卒未暇以為久之倪公來請益亟余惟女士之以節著者始自宋伯姬至范蔚宗遂取其類以列於史余編排史事方欲舉古來卓卓可記者附於輯覽而節如孺人顧不為序次行事勒諸貞石其何以訓於女士以徵信于惇史乃按行述而志之曰孺人姓唐氏祖某父某世為蘇州某縣人孺人少讀書通孝經論語在家以淑孝聞年十七歸

于陶君廷珮四年生一子澍又三年廷珮病卒孺人不欲生
舅姑慰之曰吾兩人在且若又有孤徒以身殉無庸也孺人
乃壘而襄事事舅姑益謹舅病侍湯藥兩閱月不少懈及歿
哀毀盡禮姑歿亦如之其撫澍慈而有法總角擇嚴師傅教
之又時時自爲督課及澍長以事入京師孺人誠曰汝年少
未更事宜善自防檢以守身者事親勿遺而母憂蓋其明義
理識大體有不可及者庚午澍復北行孺人病會澍所娶陸
氏又以產亡孺人悲痛病遂不起以乾隆庚辰八月十二日
卒年四十有七孺人居者凡二十三年陶君名某廷珮其字子
一卽澍也孫一人惟常以某年月日與廷珮合葬於阡嗟乎
方廷珮歿時澍才三歲孺人僅二十三耳熒熒一弱女子措
持內外以事舅姑以教其子至于子旣成立克有家室而子

婦又前歿然則孺人人生平茹荼集蓼其忻然而滿志者蓋未
之有比其卒也年不逮中壽又不獲其子視含殮以歿而又
以年例未符不得與旌門綽楔之典澍之哀痛其母倍于尋
常而亟欲使有傳于後也豈不宜哉爰系以銘曰

生而華撫芝蘭榮也長而孤惻霜露零也銜辛茹苦守以貞
也送往事居婦道成也云何風木斬遐齡也幽幽新阡鬱佳
城也烏頭雙闕佇寵靈也千秋彤管眠斯銘也

張母吳太孺人墓志銘

余與張子商言交十有五年聞其母氏吳太孺人孝行甚備
乾隆丁酉正月二十二日太孺人以病卒京師余唁之商言
擗踊號慟請銘余謂商言博學能詩文當如李泰伯宋景濂
自爲文以傳不朽而商言請益堅乃按狀而次之吳氏本歙

人祖諱延古任吳江縣訓導始居蘇州考諱盤不仕太孺人年二十二歸於贈徵仕郎中書舍人張君經徵仕君通判君岑所生出爲伯父徵君崧後徵君以文名名士多主其家每燕集太孺人先具精膳以俟徵君顧而喜之時以潤筆所獲市閩粵珍味賜孺人笑曰兒能供我酒醴可無報耶所居通胥江梅雨漲魚戢戢浮檻下太孺人呼殿師捕之以進徵君益喜曰不圖新婦乃有吾家元真子風味也始太孺人才告廟通判君卒嗣所生所後之舅姑以次殂謝太孺人經營喪葬心力爲殫常嗚咽語人琵琶院本中趙五孃言著十二年孝服吾之謂也蓋徵仕君爲人後所生服宜降等而太孺人與正服同故言此以志悲感云生平樸雅寡言笑三四十年未嘗簪服金繡見士女時世妝曰此人痾戒之弗效叔無子

從懇徵仕君爲置媵叔用是生丈夫子二其明大義如此太孺人生于康熙四十一年八月十八日丑時距卒之日年七十有六遇 國家覃恩敕封太孺人子三仲傳中先歿長傳心迪化州吏目季埴卽商言內閣中書舍人孫七孝惟孝白孝門孝雙孝標孝彥孝康曾孫二友孟友仲徵仕君先以乾隆庚辰卒葬吳縣二十一都貞山之陽及是年某月某日合葬于其墓太孺人少時多神仙靈應之事又好佛愛幽居耽竹石花卉以閨壺之常故不著著其孝行銘曰具區之濱山水族也以嘉魂魄以大嗣續也楓櫛秋殷兮梅以春妍孺人逝兮曰歸斯阡若堂若斧兮魂魄以安並茲懿行兮垂于千年

葉孺人墓志銘

乾隆五十八年十二月廿六日顧子德言將合葬其母于某原介張子興鏞來請墓志之文張子之言曰孺人葉氏松江府南匯縣人贈工部侍郎謚忠節公會孫女年十七歸華亭顧君世望孝舅姑及夫所出之姑勤于操作夜則以女紅佐讀夫病刺血具疏焚禱甘以身代既歿將殉之舅姑誠曰我老矣汝叔幼汝子纔四歲俯仰皆藉汝毀以滅性不可孺人自是強起將事修蘋蘩親井曰入其室長幼愉愉如也視其家內外秩秩如也素知書史德言少長督以課讀弗懈姑目盲舐之復明德言病癘勢劇醫言蛙膽可愈時方寒孺人哀籲於天果得蛙以和藥及舅姑繼卒哀苦骨立治三喪營葬心力交瘁咯血遂不起以五十八年二月初八日歿蓋生年四十守節二十年親黨賢且愍之行將請旌於朝以俟烏

頭綽楔之典焉嗚呼生人之相嬗也在傳家保世而已矣以陰陽之合佐內外之政使老者有所養幼者得所教底于成以守其家則生人之道盡是矣蓋庸行之常而能此者丈夫子往往難之況婦女乎安常處順者難之況所天早逝顛連無告嫠婦獨任其責者乎卒之仰事俯育以養以教門庭如故不墜其家是可爲尤難者矣自劉子政范蔚宗傳列女後之惇史專以節烈屬之截髮髻面接踵而起然能踐庸行之常盡生人之理及至鞠躬盡瘁卒以身殉則諸史所傳亦未能多覲也以膺旌典固其宜矣德言頭角嶄然將發聞于世於其請也爲述梗概且系以銘曰

家人占吉利女貞少而不造悲孤惇堂上霜雪鬢已盈懷中
呱泣衣初縹雖死奚忍厥淚熒癡思泣血心怛怛而喪而葬

而婚成精銷力槁積疾嬰下報所天安求生金膏勿受摩以
肱高墳三尺從夫瑩琢銘于幽世其型青史眠此標高名

誥封許母胡夫人墓志銘

往余仕京師迎養我母錢太夫人於邸舍四方士大夫之令
妻壽母以時節來起居者魚軒翟絳相望於道而錢太夫人
獨稱胡夫人爲最賢謂其通詩書知大體古來列女傳所稱
無以過焉予心識之不敢忘夫人蓋德清許君祖京之配也
後二十餘年許君以廣東布政使歸遷杭州予亦以致仕來
主敷文書院見君及君之子主事宗彥知夫人神明不衰白
首相莊如故心甚幸之而今年二月以肝疾卒於內寢於是
君悲賢內助之失也條具懿行作爲事略屬爲志墓之文按
夫人姓胡氏浙江德清人祖承吳雍正癸丑進士直隸贊皇

知縣父官龍乾隆丁巳進士山西祁縣知縣夫人生而端
不苟言笑年二十歸於許君事舅姑盡孝治家以肅如媿
如姑輩愉愉如也家素貧米鹽瑣屑親爲節縮治女紅蠶織
晝至夜分不輟以佐家食奩具典鬻殆盡不使許君知也乾
隆二十三年君鄉試中式明年成進士官內閣中書閱三載
大人來京日披家事夜課兩子讀書如嚴師四十一年君補
授雲南鹽法道挈家行雲南鹽出於井不足則以銅易廣東
西鹽故參錯糾紛積爲虧缺君極意整飭檢核冊案不休夫
人益勉以清操曰先事慮防可無後患矣其後制府興大獄
君獨免于牽絿四十七年君遷按察使錄囚恐州縣失實不
能卽決夫人曰慮其有寃庶幾無寃矣五十年君遷廣東布
政使廣東繁富奢侈夫人益以儉約行之家無餘資室無珍

玩節儉如儒素時嘉慶四年宗彥成進士改兵部主事以親年高又鮮兄弟卽假歸夫人撫子曰汝年少德業未充正當求開物成務之要再效馳驅未爲晚也其知大體而澹於榮利如此夫人生於雍正十年六月終於嘉慶六年二月年七十以許君官 誥封恭人晉封夫人二子長翼宗監生 召試二等候補太常寺博士早歿次卽宗彥進士兵部車駕司主事女一適山陰監生王思鈞孫四長延恩爲翼宗後次延案次延澤出後君弟爲嗣孫次延敬孫女二皆幼卽以是年十一月十九日葬於武康十七都春岡領地嗟乎我母之稱夫人也蓋在乾隆四十年間後數年而我母卒於江西官舍今又閱二十餘年而胡夫人亦逝追維往事有足悲者而回憶我母緒言益知君之事略皆可信不誣故摭其要者書之庶以慰君之悲焉銘曰

母儀內則禮所宗也康強好德兼考終也山環水複奠幽宮也我琢銘章垂無窮也念憶母訓心忡忡也

亡妻鄒氏志略

君諱貞字孟吉世爲蘇州府長洲縣人其氏族詳見外舅鄒府君墓志君年二十歸于昶家貧甫七閏月先大夫卒家人皆疾癘以是益貧君事兩姑唯謹躬操作屋東偏有榭樹二秋風厲 膏陰積葉尺許君縛帚取以資爨具冬大寒雪釜鬻甕盎皆凍君辨色興鑿冰孔得水趣一小婢舉火俟姑起則湯茗糜粥悉具少暇紡吉貝花爲線共織者用日率以爲常蓋勤苦如此然性木訥終弗肯自言及昶通籍爲中書舍人君持家如初不變乾隆二十六年四月以積瘁病及七月初

八日歿距生雍正三年乙巳年三十六歲生一子未周月殤後二十一年始葬君于崑山縣雪葭灣從先舅姑兆且銘其幽曰

君之卒也余母哭之過時而悲其能孝可知也柎無新衣篋無珠璣其能儉可思也曾不終壽兮卒隕以羸依舅姑于九原兮庶猶疇昔之提攜回憶從我于艱難兮忽萬感之淒其

芸書志略

芸書陸姓名繻余同里人九歲來余家性修潔嚴覩終歲不易衣而瑩然無塵土雜恒若拂拭澹澀者以故余母錢太夫人絕憐之乾隆戊寅從入都庚辰冬太夫人病芸書侍牀足請所須具湯茗而進之坐以假寐不解衣帶者二十餘太夫人旋愈益憐之命事余壬午生一女粹卿遂病瘵迄

丙戌七月二十九日益半會余夜直太夫人將使使以聞芸書微視曰不可以我故驚主乃絕年僅十有八閱五年歸其柩又十四年葬于雪葭灣祖塋西隅因以磚朱書書志納諸壙云

許孺人志略

孺人許姓字雲清名玉晨其先徽州人蓋許文穆公國之後父以訟破家孺人同其母常出居尼媼所我母錢太夫人適見之使蹇修焉故孺人歸於我性慧幼工針繡後學書亦秀整爲余寫書每日能十餘紙從余京師學詩作近體往往得佳句於時錢塘方芳佩吳縣徐玉映見所作愛之遺書問候有聞于閩秀問乾隆三十七年壬辰四月十六日戌時遘病驟卒先是余以戊子赴永昌軍營孺人獨家居事錢太夫人

掩抑憔悴意不自得至是遂歿卒不知病狀云何也距生於乾隆三年戊午六月十六日酉時年三十五後十三年壬寅十二月二十八日葬於雪葭灣祖墓之西子生壙之左側是爲志

汪容甫墓碣

汪子容甫歿之明年十一月予過鎮江其執友劉君端臨具事實請予爲墓碣之文容甫名中揚州江都人曾祖諱鎬京祖諱良澤父諱一元三代皆不仕容甫少聰敏讀書數十行下而確然隕然不形于詞色少長遂通五經正義及羣經註疏貫串勃萃其積穰穰有叩者則應對不窮是以有司及學政率驚異而愛重之年二十試第一爲學生乾隆四十二年拔貢生容甫壯年氣益盛志益專由經暨史於天文地理六

書九章與高郵王君念孫及劉君聲望相上下從子游問以質子子仿顧寧人先生廣師一篇道三子之學容甫大喜謂予真知己也是時 朝廷方修四庫館書書成頒於揚州杭州俾各建閣以儲之而書帙浩繁裝潢編排鹽政全君難其人予以容甫荅遂使主閣事明年全君調杭州重容甫才又兼掌文瀾閣因至杭州館梁孝廉玉繩家澗中名士聞其來率釀酒飲之容甫益大喜而江都御史江君德量爲生平至好適聞其訃且屬爲之狀容甫慟纍竟日筆欲下復止遂得急病以乾隆五十九年九月二十日終于杭距生於九年十二月二十日年五十一妻朱氏子一名嘉孫十一歲女二一適寶應劉書高次適儀徵諸生畢貴生全君歸其喪葬於甘泉縣禪智寺北葉家橋西容甫著有述學內外篇四卷皆攷

解精密能闡聖賢意旨於千載之上而惜以中道徂逝未竟其業故劉君深以爲痛焉求予爲文亦猶容甫之志也夫

文學汪君墓碣

同年汪君東湖之孫樹棠常不遠三千里謁余於青浦求序其祖之詩余旣撰而予之又一年則持其父文學鳳林墓志求爲墓上之文予將入都應千叟宴之 召踰年歸再以鼎湖大事赴都卒卒不暇以爲而樹棠來請益堅至三四而不懈甚矣樹棠之孝不忘先德者至也文學東湖子名藹字吉臣號鳳林少慧五歲出就傅已知經書大義八歲能詩稍長工制舉義受知於學政今大學士劉公墉遂爲博士弟子後學政大學士梁國治亦愛之屢列優等而卒挫於省闈鳳林弗介意也東湖以舉人選蕭山縣知縣廉潔自命苞苴謝

絕鳳林助之茹荼飲藥益以清操自砥礪在縣三年甯無新衣笥無長物而仍以不善事上官改教諭歸未幾而卒文學居喪廬于墓者三年事繼母尤孝遇疾衣不解帶者月餘疾卒以愈東湖君所貽皆分之兩弟而自取樸陋性最耿介乾隆辛卯江寧太守沈君業富亦東湖同年也時文學將錄科沈君監試欲爲先容堅謝卻之以此益爲沈君所重焉文學生于乾隆六年九月十一日歿于丙申七月二十日其歿也先數日自知逝期焚香端坐而瞑配韓氏先文學而歿于四樹棠長也次樹本次樹槐側室焦氏出次樹棻皆守家學能讀書而樹棠尤以篤行著鄉里縉紳間嗟乎文學見世之仕者舉手搖足無不視爲利藪民生彫瘵漠不關于心常以爲人心世道之憂故其助東湖者如此而連蜷偃蹇弗獲稍伸

其志洵可哀也已雖然文學著有詩文二十卷樹棠將合而梓之以傳于世是文學之志既可慰于地下并可以慰東湖也已若夫世系籍貫已具墓志中故不復敘云

振華長老塔銘

圓津禪院歷代諸長老皆以能繪事工篆刻世其傳流風餘韻益昉語石語公歿貞朗蕉士繼之以及旭林而名益盛余少及見旭公其畫本諸家世益以王翬爲師旭公老授筆法於振華而篆刻尤工然樸質沈靜退然不自見所長是以其畫雖散落四方友大且梓行其印譜而世之知之者絕少院瀕於漕溪精舍皆清迥幽絕爲東南名士游賞地振華飾其所未備與其所已廢又取名士詩文書畫裝潢藏弄無損蝕遺佚以供來游者之玩筆墨稍暇率其徒侶從事於耕作不

以勞動自解又嘗受款人方楚厓醫法問出以應病者之求縣令稔其誠慈命司僧錄意故條然不屑也嗚呼觀此足以知師矣振華童姓名本曜蘇州吳縣人生康熙六十一年某月日滅以乾隆四十九年十一月十三日僧臘五十有六世壽六十三弟子二人曰覺安覺銘師寂時余方由西安移任雲南覽銘以書來云吾師將以五十二年某月日葬吳縣之堯峯願有以銘於塔余童卯時常往來於院蓋交于師者五十餘年矣銘何可辭銘曰
弗問禪弗縛律唯藝事之能以窮日也勤農功兼醫術事理如如亦權亦實也堯峯之山雲林蒙密用爲供養永安其室也

春融堂集卷六十

墓表

翰林院編修朱君墓表

乾隆三十六年春 日講起居注官翰林院侍講學士安徽學政朱筠上言伏見

皇上稽古右文勤求墳典請訪天下遺書以廣藝文之闕而前明永樂大典古書僅有存者宜選擇繕寫入於著錄又請立校書之官參考得失併令各州縣鐘鼎碑碣悉拓進呈俾資甄錄奏入

上嘉之乃 命開經史子集四庫全書館以大學士劉文正公統勲于文襄公敏中尚書王文莊公際華充總裁官文襄

公復選翰林中書二百餘人充校對官以任之分日呈覽凡
十餘年而書成藏於文淵閣度其副于盛京圓明園翰
林院及江蘇之金山浙江之西湖復寫一分置于瓜州大觀
堂分地藏弄嘉惠後學於是人文炳曜遠邁唐宋而其始實
自君發之君字美叔一字竹君其先家浙之蕭山曾祖必名
始來京師祖登俊中書科中書舍人父文炳陝西盤屋知縣
兄弟四人兄堂陝西大荔縣丞次垣乾隆辛未進士山東長
清知縣弟珪乾隆戊辰進士今官內閣學士兼禮部侍郎君
年二十五中乾隆癸酉順天鄉試明年成進士選庶吉士又
二年授編修歷官右贊善至侍讀學士左遷仍授編修提督
福建安徽學政者二充福建主考官者一充辛巳巳丑辛卯
會試同考官者三充戊子順天鄉試同考官者一又充方畧

館通鑑輯覽三通館日下舊聞纂修官以四十六年六月某
日卒於里第年五十一君少英敏博聞宏覽於學無不通解
經宗鄭孔而兼參宋元諸儒之說論史宗涑水而歷代諸史
亦皆考究貫串証其同異古文效法班史詩歌出入韓蘇取
精用宏海涵山負天下承學之士趨風附景若斗之有杓芒
寒色正望爲歸依好宏獎後進有一技之長譽之唯恐不及
掖之唯恐不至如大理寺卿陸君錫熊吏部主事程君晉芳
禮部郎中任君大椿皆君所取士而黃君景仁洪君亮吉輩
皆北面稱弟子君豐頤晬面望之溫然閒以諧笑飲酒至數
十斗不亂或以爲道廣然於名節風義之關揚清激濁分別
邪正斷斷不稍假易且欲自廁于李元禮范孟博之倫宰執
高君之名者招之不往怵以危詞君亦漠然置之故四庫館

之設君不獲與其役人或爲君惜而君弗介意也君卒時余方銜恤家居聞訃位于寢門哭之又二年入都其孤錫占錫庚來告曰先君之喪已葬於宛平二考莊之源且屬章進士誌於隧矣墓道未有刻文敢以爲請余與君鄉會試皆同年又常充同考及纂修官流連文酒商權圖史無弗同者是以世有北朱南王之目蓋其文章風節顯顯然常在心目間知君之深莫余若也因舉深知而親見者書之俾刻于石昭示來者且以志余之悲云

誥贈奉政大夫訓導馮君墓表

欽州距廣州府省治千有餘里在西南海之濱其人皆樸質椎魯不求聞達於世故著名於朝籍者獨少而戶部馮君敏昌先以選拔貢生舉鄉薦旋成進士由庶吉士而授編修以

通經好古能詩文名藉藉公卿間及叩其淵源所自則皆其父天巖府君之教也君廉州增廣生幼穎悟通於春秋江蘇劉侍郎星煒江西程侍郎巖爲學使時交器重之拔置前列然秉性閑澹徙居州之南雅村絕意仕進庀甘旨蒔花木得兩大人懽心及居喪哀毀中禮又得屯馬村吉壤而葬之舊時祖居在中屯者歲久傾圮治而新之建數十楹以爲宗祠族人賴焉歲貢於州尊以例當補訓導署開建縣學專以植士風崇禮教爲務其署臨高花縣兩學亦然勤於月課每爲諸生口講手畫衆皆樂就焉又二年荷 覃恩敕封儒林郎翰林院編修先生乃辭教職以歸又明年恭遇 萬壽入都祝

釐就養子舍佳日往游西山戒壇潭柘諸寺居久之因懷家

中諸孫遂歸歸六年示微疾而歿君性好奇山水自廣東至京師所過名勝必遍覽而返赴臨高任出匡門浮大海觀扶桑日出波濤掀簸吟嘯自若熟于圖史少時所讀經書迄老不忘而於資治通鑑迴環誦悉能舉其大義其奇偉之節與探幽覽勝之懷有過人者戶部君秉承其教好古能文著名朝守以此也君名達文字學海號天巖生于雍正三年八月二十九日卒於乾隆六十年十月初十日享年七十有一名經邦者考也名應祥者祖也名日明者曾祖也三代皆誥贈儒林郎翰林院編修林太夫人其配也子七長卽敏昌敏昭貢生敏曙廩貢生敏暉敏昇敏暹敏晟殤女六人孫九人敏昌等以某年月日葬於某鄉某原考欽州爲漢九郡合浦故地自漢武置郡之後凡八百餘年而後姜公輔爲唐

肅宗時宰相又越九百餘年而生君父子蓋南交之地天涵海負閱時旣久則靈異所鍾必有通儒碩德出而應之者今君父子已開其先則子孫騰華著實不待卜吉壤而可徵也予在京師與戶部君爲文字交而惜未見君之儀采也故允戶部君之請書其行蹟以表於阡庶海南人士觀感而興起焉

翰林院侍講學士充國史館提調官邵君墓表

學士邵君之卒也卿大夫相與悼於朝汲古通經博聞宏覽之儒相與慟於野而大臣之領國史者迄今尤咨嗟太息重惜其亡蓋國家最重史職選於翰詹諸臣中品詣學問最著者充之而以提調爲其長每作傳必據實錄起居注及內閣紅本皇史宬副本合采事實敬謹載筆其稗

篇叢說不得而雜入之庸以昭信于後世而君以文望在史局者十餘年咸以爲魏儼章述之比每有進御

天子嘗爲嘉獎故大臣相倚如左右手君洵爲史才之良矣君名晉涵字與桐號二雲餘姚人浙東自明中葉王陽明先生以道學顯而功業風義兼之劉念臺先生以忠直著大節凜然及其弟子黃梨洲先生覃研經術精通理數而尤博洽於文辭君生於其鄉宗仰三先生用爲私淑故性情質直貞亮而經經緯史涉獵百家畧能誦憶乾隆二十四年年十七補縣學生三十年舉于鄉三十六年辛卯會試第一成進士歸部銓選三十八年詔開四庫館蒐訪遺書秘錄大臣以君薦特授庶吉士踰年授編修五十六年擢左中允充日講轉補侍讀歷左庶子翰林院侍講學士充日講起居注官

文淵閣直閣事

國史館纂修官晉爲提調官典廣西鄉

試者一教習庶吉士者二而在國史館最久編纂亦最多平生著述繁富有孟子述義穀梁正義韓詩內傳攷皇朝謚迹錄輶軒日記南江詩文稿而爾雅正義一書薈萃古訓以補郭璞邢昺之未備尤爲學者所稱君子歷代史事融洽貫穿嘗於永樂大典中采薛居正五代史參以冊府元龜訂其同異遂爲全書又病宋史南渡以後麤疎無法仿王偁作南都事畧又畢總督沅撰續宋元通鑑嘗屬君刪補而攷定之蓋君之於史學演衍蘊蓄囊括富有更非人所及也君曾祖炳縣學生配某氏祖向榮康熙壬辰進士官鎮海教諭配某氏父佳銳增廣生配袁氏三代皆累贈中憲大夫配皆贈恭人配何氏封淑人子二長秉恒諸生次秉華嘉慶辛

酉副榜貢生君生於乾隆八年某月日卒於嘉慶元年六月十五日享年五十四以某年月日葬於某鄉某原少詹事錢君大昕已誌其墓故餘不備書嗟夫君雖私淑浙東三先生欲求其學以見於施行而久居侍從爲

天子所知乃未及大用中年殂謝立德立功立言視三先生少遜焉宜知君愛君者咨嗟太息於無窮也子自四川還朝始與君相見迄今二十五年矣見君溫溫然恂恂然初不欲以才智自矜及與之議論史事上下古今則颺發風舉凡古來政事之得失人之消長君子小人之元黃水火莫不決其弊之所由與害之所由終俱與三先生之說相同俾聞者咋指而歎變色而作蓋有補于世教人心甚大徒以其旁通訓詁謂方名家數之咸通草木蟲魚之多識叢冗禿屑是豈足以盡君哉故於秉華之請舉其大者揭於隧道使後來得所考焉其亦君之志也夫

河南道監察御史胡君墓表

君胡氏諱紹鼎牧亭其字湖廣孝感縣人祖世英官總兵從征吳三桂卒於軍 賜葬祭配王夫人父德麟由蔭補守備終于廣東參將配尹夫人君與弟紹會皆徐宜人出君家再世以武功顯及君始習爲儒然質直寬厚篤修內行而遠于文士輕華馳騫之爲雍正辛亥年十九補博士弟子乾隆辛酉年二十九舉湖北鄉試甲戌會試第一選庶吉士丁丑授編修明年休致歸辛巳復本官旋充 國史館纂修官甲申改浙江道監察御史戊子主雲南鄉試庚寅以妻程氏卒乞假歸壬辰還 朝補山西道監察御史乙未轉河南踰歲而

卒君工于時文簡古淡泊不務可喜甲戌會試錢文敏公得君文驚歎謂王氏鏊唐氏順之復出力贊於大學士陳文勤公以冠多士其爲詩及散體文如其時文然皆隨手散去不自收輯僅而存者又汰去十之三四所進奏疏多手削其藁蓋無意於人知如此然君始舉于鄉也方壯以尹夫人年七十絕意仕進凡十二年尹夫人病君衣不解帶者五閱月故人稱其孝君爲御史前後十年不肯刺舉瑣碎言必剔民隱厲官方故人謂能舉其職君落落穆穆喜愠不見于色與之遊久而愈可愛慕皆曰君爲寬厚長者而不知內行淳至見義敢爲宜其于詩于文涕唾視之不屑以介意也君常敘其所存藁言古人之詩或傳或不傳其傳于後者未必盡如古人之意卽以詩傳而于其人之生平豈加豪末又言人心厚

則言不佻人心畏敬則言不肆能養其性情之正則言日和平而進于道非貌托古人以取譽于世夫亦求其所以自得而已繇斯言也可以知君矣君生於康熙癸巳二月二日卒于乾隆丙申十一月二十六日年六十有四以某年某月日偕妻程氏葬于某阡子三聞若聞起聞苜孫某君自妻歿後貧甚獨挈其子聞若走京師舍于其縣之館故其卒也聞若謁志于朱編修筠而丐余爲墓上之文余與君同朝殆二十年知行誼爲詳庸敢采掇大畧俾樹之隧道以詔來者

進士劉君墓表

乾隆甲戌雲南之士與余同舉南宮者三人尹君均倪君高甲及劉君鑾時座師內閣學士錢公數爲余言劉君邊地之才士也余以此心識君顧是時方釋褐不暇數相見旋各歸

班散去後十八年余從軍永昌詢諸土人乃得君之子於軍中窶甚方爲吏卒傭書以生召使前問之則君之卒十五年於茲矣於是其子泣而言曰吾父成進士歸歸二年病歿某時才十一歲爾又年餘大父母卒又二年伯父三人先後卒長兄亦逝越十年而吾母遂歿獨病瘵以歿數年之中死亡者蓋十有餘人家本貧盡斥所有庀喪事母亡之日僅得合而葬諸墓而墓石尚未有刻文也惟夫子哀焉爲之辭按君名鑾雲南永昌府保山縣人祖默之邑諸生父庶壇雍正癸卯舉人君出爲叔父庶埴後庶埴以貢生任四川蒲江令故君娶於蜀張氏有兄四長鍾次鈞次錯皆乾隆丁卯舉人次鏡諸生君工書爲諸生有聲乾隆癸酉舉於鄉明年成進士其生也以雍正丁未八月歿以乾隆丙子七月年二十九歲

葬於縣北四十里之官坡子一某女子一今育於姊王氏嗚呼君之祖父世以讀書舊德著於鄉及君復連年取科第人望君謂富貴若可戾契致者顧遽以病歿而父母兄弟妻子死喪相繼究也無以庇其子豈天之遇才士如其酷歟抑其發之也驟遂不能延綿迤邐以永其澤歟彼尹君者由庶吉士改官中書舍人其子復以進士官吏部父子接跡登於朝而倪君亦由吏部郎出爲廣東巡道今且請養歸於家矣而君獨偃蹇短折阨於身後者復如此豈非其命也歟乃敘君之世次事實鑱諸石以待之世之人或有眎此而哀君并憐其子者是爲表

山東長清縣知縣朱君墓表

西安咸寧縣知縣朱君勳余舊屬也以書來告曰勳之家世

執事知之素矣先府君在鄉爲善人任州縣爲循吏當世莫不聞其賢而連蜷偃蹇以歿今謝世已若干年而卜葬亦若干年矣墓道未有刻文曷以傳信於後敢以文爲請按狀君名懋德字調梅勉旃號也其先與徽國文公同出新安明初始遷常州府之靖江文章名節代有聞人祖某父某皆隱不仕君行三少而孝友侍父疾目不交睫者累月父卒析產讓財於其兄比長筮仕得直隸完縣知縣時方大禋躬歷鄉村盡發社倉穀以貸之民困始甦以出借過多奪俸七年勿悔也縣故多旂園地昇平日久佃民各附近開墾業主思奪之君亟言於上官請以園餘墾熟之田許民自首悉照例入於糧額升科而田則歸民執業一時首墾者至千餘頃勢要無如何也縣歲辦蘋婆果解京物微任重君請咨部免其役縣

志久殘缺獨修輯之調長垣邑繇劇素以難治名君鋤強扶弱豪右爲之斂跡境有太行堤堤生菱歲折徵解南河銀一千兩繼荆龍決口淹堤草不生而額解之項自在累及原戶子孫君復請豁免焉遠公書院膏火田五百八十畝爲有力者所占君贖回之歲收其租延師開學以興文教未幾爲郡將所誣罷職事尋白謁選得山東夏津縣縣被災悉發倉儲減價出糶民大悅縣有牲畜稅君謂牛乃耕畜詳免其稅徵糧舊有合勺之零官吏藉以取盈君盡蠲除之著爲例調長清察民所苦在辦解京之闕布僱運糧之腳費勒於碑盡除其累後長清復禋賑例發米同僚憚於撥運欲代以銀君昌言曰饑民得銀不及得米之半何惜費而不惜民遂撥米一萬二千餘石賴以存活者數萬人引疾歸里造家譜置義田

七百餘畝收息以贍族之貧者平生御子姪嚴整有法交接親友則怡怡如也故無不敬而慕之卒年六十八預剋亡期朝衣冠端坐而逝配聞氏封恭人以某年月日合葬于某地之某原子三長煦仕紹興府知府次照仕四川直隸敘永同知其季卽勲也余覽東漢陳寔韓詔諸人時稱四長咸以名德爲世所尊浮沉下僚卒老於鄉里豈其高風峻節弗屑以學術阿世故名位不克大顯歟而寔子紀仕大鴻臚孫羣仕至司空韶子融官太僕豈非不於其躬必於子孫歟今君三子均登仕籍勲尤以材俊見知於當事發名成業將昌君之緒以大其門閭而勲以胚胎世德砥礪服官必能無歉於公慚卿卿慚長者世之牧令望其松楸稽其事實當有感於君之惇德而卓然興起者矣是爲表

蔣升枚墓表

君名業鼎字升枚蘇州府長洲縣學生祖深舉人預修明史歲滿選貴州知縣尋遷山西朔州知州有詩名世稱爲樹存先生父仙根貢生以工書聞於時吳編修大受王侍御峻成推重之蔣氏爲吳中望族其子弟率輕雋以侈汰自喜君又風神閑雅望之如藐姑射神人顧承其家學獨嗜書作爲時文娟妍靜好求底于極工其于詩也亦然君師光祿兄鳴盛因與今學士錢君大昕編修曹君仁虎褚君廷璋暨余交好數邀余輩過其家交翠堂交翠堂者樹存先生讀書之地前西疇閣稍偏倚梧巢又西蘇齋前後皆池水映帶花藥環之堂中儲書數千卷前人名蹟數百冊石刻之精美完好者尤夥余輩往往窮日移夜繙閱而不能舍以去乾隆甲戌余以

會試在京師月必得君書問戊寅余入都補中書舍人別君于潯墅舟中相對黯然而不自得嗚呼孰知其永別也歟先是康熙己卯樹存先生集羣賢于交翠堂作送春之會尤西堂侍講齒最尊而歸愚宗伯以後進與焉閱六十年君復與于斯會以宗伯主盟吳中傳爲盛事又有張憶孃者名倡也昔惠天牧顧俠君諸公皆昵之樹存先生繪簪花圖藏于交翠堂歲久遺佚君購得復裝潢完整丐詩以續于卷尾蓋余自入都後聞其風流好事又如此君以乾隆己卯某月某日卒又一年而君之兄業晉以會試自南來走告余曰吾弟之歿光祿先生已志其壙矣惟墓道之文敢以煩吾子則涕爲之表使鏡于石君卒年二十有九娶吳氏生女一無子弟三人某某兄業晉以舉人方爲湖北知縣云

江聖言墓表

嗚呼余于聖言之歿蓋久而不能忘其悲也聖言與余以乾隆二十三年別于揚州後十有四年余以從軍在蜀西南徼外四方朋好音問阻絕聖言從其從祖夔州太守所獨數寓書于余余告以軍事了乞假南歸當相見又四年而余還朝又三年庚子春余乞假營葬過揚州往訪之聖言病方劇聞人辭焉及秋北上則聖言歿已兩月矣蓋以二十餘年之別萬餘里之約卒不獲一見以終此余所以久而愈悲也聖言初名炎改名立曾祖銘鑑祖之岷父啟榕皆歙縣人自父始僑居揚州揚州鹽賈所聚類皆鮮衣美食彈絲擊筑爲樂君獨好讀書時厲孝廉鶚陳上舍章爲揚州寓公頗以詩詞倡導後進君從之遊故于詞尤工中歲遊西湖愛其山水偕

春風堂集卷之十一
十一
一妾居水磨頭地蓋姜白石道人故址而馬塍者白石所葬君時攜卮酒往酌其下頗寓瓣香之意居數年有挽之者復歸揚州以卒年四十九所著詞有夜船吹簫二卷餘皆佚君歿後三年子安能以孤童自奮選爲博士弟子以書告曰吾父葬矣墓道未有刻文敢以請余不忍辭故爲之銘以塞余悲銘曰
余昨撰西湖編作君傳踵前賢推雅尚山水緣玉鉤斜孤嶼山皆勝地誰後先君今逝挾飛仙顧夙遊來往便登簫樓弄湖船攷新詞諧管絃歸于室千萬年庸慰余心憂悵

朱子存墓表

君朱姓名研子存其字先爲徽州府人大父始徙居蘇州之閶門君先世皆以懋遷致富厚讀書自君始君性穎悟山水

篆隸不甚學而能詩亦如之自君讀書而君之從子適庭以詩詞稱吳下從子凌霄芝田及適庭之子孟容仲林皆能操觚染翰與當世詞人名士往還至君之子肅徵尤風儀朗雋世目爲神仙中人時吳君企晉方以詩詞主壇坫其友有張崑南沙斗初所謂楓橋兩布衣也以經義詩古文詞相契好者則余及沈冠雲惠定宇王鳳喈錢曉徵曹來殷凌祖錫朱春橋張策時趙損之蔣升枚畫師則王存素張斌如琴客則周紫芝方外則念亭靜菴之數十人常集企晉璜川書屋而君之羣從必皆在座戊寅余以中書舍人入都別君于泚墅關追遡舊游愴惘久之其明年己卯凌霄歿又三年癸未君之訃至及余在滇適庭寓書告曰肅徵不幸又死矣惟某及芝田在然皆貧窘蕉萃無以爲生嗚呼其可涕也已君長身

玉立眉目如畫軒軒然秀出行輩昔企晉弟澤均常繪寒山雅集圖二十四人斌如畫君題壁背面風神灑落識者望而知爲子存也今圖中人先君歿者冠雲定宇存素升枚後君歿者紫芝策時損之存者僅十之五蓋二十年中盛衰死生離別可感如此且適庭芝田之外企晉鳳喈在蘇州曉徵歸太倉春橋歸桐鄉祖錫歸上海來殷客西安澤均遠宦雲南斌如不知所往靜菴念亭兩僧亦不復出山矣獨余塊然以官居京師適庭又以書來曰吾叔與弟之歿貧不克葬丐諸親友始得窆于靈巖山惟執事憐之敘其生平以表于後世按君父諱咸諱陵者大父也諱方泰者曾祖也娶沈氏子一莅恭卽肅徵也君生于康熙癸巳十月十七日歿以乾隆癸未十月某日年五十肅徵生于乾隆戊午八月十四日歿以

乾隆辛卯四月初三日年二十四妻汪氏無子女一未字著有雅材堂初稿凌霄名漢倬元和縣學生芝田名澤生孟容名士廉監生仲林名士隅今爲浙江象山縣巡檢王存素名懔太倉州諸生蔣升枚名業鼎長洲縣學生吳澤均名元潤今爲雲南普洱府經歷張崑南名岡沙斗初名維杓張斌如名恂常州府人周紫芝名瑞蘇州吳縣人念亭名正感靜菴名天平山中峯寺僧餘皆知名于時故不具載

文學呂君墓表

乾隆己亥呂子星垣從余自吳入豫每誦其父文學君之賢輒熒熒然泣下也且曰某無似先君尚在淺土今將簪日卜地求所以銘于幽窆者余悲而諾之明年余以按察使江西旋遭太夫人之喪久之不克以爲而呂子遂以辛丑十二月

某日葬君于其縣之曹塘橋於是復來請曰吾父之葬有鄭贊善虎文爲傳袁明府枚爲志而墓道尚未有刻文敢卒以請會余已逾小祥乃握管而爲之辭君名廷揚字對宸號蘋圃少有器度九歲熟五經十九爲郡學生下帷攻苦有聲黌序久之入太學屢試南北鄉闈終不遇以卒然敦孝友尚氣誼往往爲人所稱幼而喪父哀毀不食因得滯下疾腸出寸許保姆裹以敝絮摩挲良久乃漸愈常侍母病不脫衣帶者三月筋骨大損後遇陰雨輒痛楚不能反側母性嚴治家無所假貸君年四十稍不當意猶訶責及之君退乃竊喜曰中年人尚有母教故不易得也他若事寡嫂撫孤姪治伯兄孝廉君喪于京邸盡哀盡禮其孝友類如此君佐高陽縣知縣周世紫幕值軍行促令解餉赴省期三日而道遠險隘特甚

君請代行疾馳兼晝夜馬驚墮澗攀藤葛以上如期抵省周因以免重譴素善同里吳文夙吳館榆社縣署君稔其疾從高陽往視之及卒又護其柩以歸急難好施不以貧窘自解故人益以爲難君世爲江蘇武進人高祖諱宮順治丁亥殿試一甲第一名官至宏文院大學士曾祖諱方嘉祖諱鈞俱歲貢生父諱灝候選州同知母徐氏配錢氏 誥封資政大夫刑部左侍郎諱人麟之女子一星垣常州府學廩生女一孫男一寶璐以乾隆四十三年某月日卒年四十有六君旣以文學名于時而孝弟惇信復見重于鄉里人謂君懷文抱質將繼宏文之後光大其家顧十二試不得當於有司且不獲中壽以歿宜呂子之不勝悲也雖然呂子安貧力學工詩古文詞嶄然見頭角矣發聞成業知必有以顯君者乃俾勒

文子墓以訊後人

貢生吳君偕朱孺人合葬墓表

吳生嘉照兄弟三人從余游前後幾二十載嘗泣而告予曰嘉照等之少孤夫子所知也先人以貢生篤行義嫻文章屢試躋於有司就職州佐年四十五而歿比歿也無一椽之覆無一畝之植我母朱孺人勤苦操作督課嘉照兄弟力學每至夜分鄰人戴姬嘗云我再睡再醒猶聞吳家讀書紡織聲也今嘉照等已長不獲發名成業尊養老母以顯揚繼先人之緒而老母年將七十矣幸夫子爲之文著其生平艱貞困苦庶藉以進一觴歟余諾之未果而孺人已先期歿又四年而嘉照等奉其妣合葬於青浦縣染字圩貢生君之阡則又來告云葬者藏也刻石以藏於幽誰知先人之厚德與先母

者惟夫子表之於墓少慰先人於地下而嘉照等無以顯揚之痛亦可以少紓萬百一歟謹按君名裕金字三祖如灝以選拔貢生仕至山西平定州知州父宏文雍正癸卯舉人任長洲縣教諭世爲松江府婁縣人君生於雍正元年十月二十日歿以乾隆三十二年六月二十三日孺人父某爲新安士族生雍正元年四月十一日歿以乾隆五年六月二十三日三人長卽嘉照監生次嘉澄捐從九品銜季嘉澧府學生皆自好力學有聞於時其能光先德而承慈教也蓋不遠矣刻于墓以俟之

邵西樵墓表

君邵姓名玘字珏庭一字西樵青浦縣貢生曾祖天衢祖式

老節曾以儒術世其家君幼能別四聲晴巖先生嘆曰此子
當詞賦知名弱冠補縣學生時荷澤劉公藻任江蘇學政
愛文拔置高等巡撫陳文肅公大受亦招入紫陽書院讀
書書院自編修吳公大受爲山長侍御王公峻繼之沈公德
潛又繼之咸有國士之目同學如通政使吉君夢熊運使秦
君鉞鏞兄弟及家光祿寺卿鳴盛少詹事錢君大昕翰林學
士褚君廷璋皆與訂文字交而汪君道謙顧君陶元陳君基
成輩方以制義名世尤交口推重焉甲子鄉試上元知縣袁
君枚以君文呈薦不遇久之商邱通政使陳君履平來聘屬
授經於其子卽今江西巡撫陳君准也又久之同里張君宏
遠任桂陽州復請修州志居湖南二載餘君之在中州也適
桐城張祭酒裕榮亦主陳氏得君驩甚及在湖南吳侍講鴻

任學政貴州盧明府世昌亦來纂書相與登山臨水往還倡
和其爲名流傾慕如此君家邑之珠街里里故有舊墅君售
而葺之中署釀花小圃黃雪廊花韻館諸勝著村居雜咏名
流和者幾百家又好法書名畫在書院久偶見名蹟或購以
歸或臨模鈎仿故藏弄者甚富所著詩詞成西樵集若干卷
君閒居二十餘年自讀書樂志而外焚香酌醴絃詩讀畫風
日佳時閒與一二詞人逸侶詩筒酬倡其性定故無待於外
求其氣清故常有以自樂列子謂天之幸民豈不信哉君以
乾隆五十八年十一月某日卒年八十有四子二早歿以從
子子培基嗣六十年正月十一日卜葬於本縣二區之謝石
闕先是晴巖先生與余家諸父同里相善也常送世父申伯
公赴包山讀書其詩見東圃集中而余年小於君十三歲當

予童卯能文君已有名庠序日後又同硯席於書院中間離
台不常及君年七十予作五言古詩壽之至八十又屬爲祝
嘏之文去年予省墓南還方與君訂香山洛下故事比余再
入京師而君旋歸道山矣此予所爲曾歛象息者也故因其
從弟璞之請揭其行事表諸新阡使後有過者惜君之未試
其用而亦羨君優游 盛世以終老也

國子監生焦君墓表

焦子循以通經澤古名於時尤深於三禮余未之識也一日
函所著羣經宮室考與其尊府君狀來請爲文以表于阡於
是知循之學蓋皆尊府君有以啟之君諱葱字佩士其先從
山東遷江南居江都黃珏橋今爲甘泉縣人祖源父鏡皆不
仕君少得王氏祖修說易之學及壯而病閉門誦經不屑科

舉壹以篤行爲先勇於爲善若水之必寒火之必熱其天性
然也自少孝友父母歿祭必泣然終身如一日姊二無子各
置田以贍其食次姊早卒遺女教育遣嫁如已生舅之子貧
無依藉飲食之五十年勿替歲有貸者將斥其所居以償之
君曰吾豈迫人以棄屋者卒不取族中貧者給以米死喪者
濟以棺斂之費佃戶貧則減其租年荒則散穀濟飢者君家
素饒坐好施中落弗悔也後亦往往稱貸於人一日將賣田
以償適姻戚有喪無以殯君悵然曰吾尚有田不可使其無
所殯分田直予之其他率多類是性情和易無疾言厲色橫
逆至受之不報謂寧人負我無我負人故鄉黨皆推爲善人
長者嘗與衆渡江中流風大作同舟人曰未有善人如焦君
而溺于江者吾輩可恃以無恐也中年于宅左構書塾植以

竹樹客至雖卑幼必加禮談經論文危坐竟日不諧謔不履非禮地戒循務窮經誼母蹈俗學倖科第譁世取寵失國
家取士求賢至意以通易理故善著熟於焦贛易林兼通郭景純諸家之術歿前一歲知數將盡啟笥取人借券毀諸火負於人者令償之曰不欲子孫失忠信也配孺人謝氏無出側室殷氏生循及律徵孺人皆愛而撫之循病至十餘日不寐鄉黨尤以爲賢太學君生康熙六十一年某月某日卒乾隆五十年某月日年六十有四孺人生某年月日太學君歿後三月亦卒年六十六卽以五十年十二月合葬于所居宅東二百步嗚呼自明以科舉文取士士所以受于親與親之所以教子莫不苟且捷得其弊日流於庸惡猥鄙而太學君澹于進取且著書其子務期于經明行修通先王制作之

大可謂知本也已兩漢大儒重師法亦重家法是以克昌厥後今以太學君之德演衍蘊蓄而循克守樸學當入於儒林獨行無疑故列序事實以表諸阡使後來矜式者徵信焉

湖北襄陽呂堰鎮巡檢王君墓表

嘉慶元年春湖北襄陽縣黃龍當賊起三月二十九日至呂堰驛巡檢王君翼孫以拒戰死事聞有旨下部視縣丞劉議卹入祀昭忠祠賜祭葬照四品以下予雲騎尉世襲罔替於是父兄收其遺衣以三年正月日招魂葬於吳縣佛伽山塢其兄芑孫具行狀事寔來丐爲文以揭諸墓嗚呼國家卹死褒忠之典至隆極備入祀昭忠者欽天監擇日工部作主翰林院立傳君以微員下秩休有烈光與公卿之死綬者等又奚藉於貞石之鐫雖然祠祀領於太常史傳存於

秘院外人不能盡見也何以表忠義之節彰彰焉若揭日月而行是表亦曷可少哉君負才跼蹐不屑爲科舉之業少善騎射能開五石弓乘騎能日行二三百里乾隆五十年考充宗人府供事玉牒成議敘發湖北補興山縣典史緣失察驛卒毆死人落職尋復原官仍發湖北效用補授今職當是時枝江賊起詭稱白蓮邪教當陽遠安應之鄖陽宜昌施南荆州諸府州縣所在嘯聚其起於黃龍當者勢張甚而呂堰當驛道之衝無城可守君聞募鄉勇潛設戒備而賊已大至君率衆迎擊殲其先鋒三人遂登大橋以禦賊賊來益衆鄉兵各潰散去君手刃數賊賊不敢近用矛環刺受傷重跳而投於水賊憤鈎得君猶瞋目怒罵不已因攢刃殺之毀其尸於橋下比賊退吏人廖之義往求其尸不獲見橋下沙中有衣

跡之乃君迎擊時所衣者因取以歸而是年八月官軍獲賊俞宗武搜其懷得君巡檢司印又自供親刃驛官狀甚悉於是君之尸雖不可得而死節大著于當世方事之殷也胡君齊崙知襄陽府事檄君入城君曰某職守在呂堰堰我死地也不往及將戰曰吾死矣作家書以別父兄付弓兵劉祿又命祿先詣官解取印以上於府蓋君之見危授命卓然不惑其志素已定矣豈比于勢不獲已而始爲湛身絕脰之舉歟君短小精悍少日入故昭信伯李君奉堯幕中游歷南北所過山海關古北口皆能記其阨塞指其形勢又從入閩夜捕盜昏黑墮海汊中援巨石而出又嘗乘騎過通州馬逸爲車壓幾殆其後馳驟如故不以自悔及署長樂縣丞會湖南永綏苗民亂縣令團鄉勇不給口食吏且以爲奸民憤怒君條

列數事上之不行及君去長樂民果變君初至呂堰鎮預立
禦賊章程一鄉勇十名設頭目一名頭目十人設總頭目一
人各相鈐制統於巡檢司一附近村落單丁獨戶皆遷於鎮
選壯者充鄉勇以備遣用一設哨探一定功過一儲軍食一
禁遷移鄉勇之外居民各安畊種毋聽傳聞輕去失業一鄉
勇團聚各習技藝不得飲酒賭博蓋其區處經畫類如此若
得一旅之師一城一障而守之必能挫鳴張之勢收廓清摧
陷之功而僅僅捐軀蹈刃以身殉職良可悲已嗚呼君負才
不偶巡檢九品官耳初無死綏之責社稷民人之寄而忠義
所激計不旋踵世之擁連城握重兵者聞之宜如何其愧怍
而見君之備膺 卹典賞延于世又宜如何感激奮勵歟自
君歿殘喘游魂馳走秦蜀聞大軍已分道合圍文武在事之

臣咸以君爲職志鞬刀而戰取螫弧而登滅此朝食當在巨
晚間君既獲死所而餘風遺烈猶足以鼓孱夫懦將之氣俾
宏濟於艱難則君亦可無憾於九京焉矣君字以燕江蘇長
洲人十世祖爲明大學士文恪公鏊曾祖纘縣學生祖世琪
乾隆十二年舉人官歙縣教諭父寅熙封登仕郎如君官娶
尤氏生女一無子以芑孫次子嘉福後其卒也年方四十二云

楊孺人墓表

孺人楊氏曾祖諱某祖諱某父諱坤曾孺人自少能習勞苦
佐其母操作如成人母卒泣目以之嗇年二十三歸於徐君
士勳姑陶孺人稔其能絕愛憐之徐君以貧故常作客孺人
獨居率其女力作巖冬竟夜務女紅指戰瘵血濡縷下用所
獲庀甘旨以奉舅姑餘則供其子之師而身自噉粥不令人

知乾隆壬辰三月舅病人見孺人顏色慘異怪潛伺之燈影
幢幢然方袒臂右手持刀睨而欲割亟以姑命嚀出之乃已
先是徐君中丙子鄉試時已揀發四川爲縣令及舅卒孺人
哀慟盡禮如所生是年姑亦病孺人移其寢夜不交睫者經
月明年又病侍奉如之於是心與力竭甲午七月二十九日
病遂不起距生于雍正乙巳五月十三日年僅五十也時徐
君先以丁外艱歸里乙未喪畢復赴四川瀕行念母老不得
偕而孺人已沒無可勝養母者乃流涕被面別其子書受曰
吾以貧故累若母若母事我父母及我豪髮無憾也又明年
丙申正月其女以哭母死越十日姑以念孺人時時哀慟亦
卒嗚呼徐氏固不幸死喪相繼而孺人爲婦與爲母之賢由
是可知也孺人生子一書受武進縣監生能文章知名于時

將以某年某月某日卜葬某原手敘事實請余爲墓上之文
因取蔡中郎胡夫人神誥靈表之例且爲銘曰

茹荼集蓼世無匹空閨幽幽閉白日姑舅居貧老且疾吁矣
薜蘿瀕遠出子口卒瘞遑自逸珍以奉親躬一溢喪則精衿
病參朮若白受辛分所必膝下呱呱冰玉質裏瘡授書荻作
筆子也達材婚有室夫也擢科爵有秩云何不祿從此畢親
申矜嗟鄰里惜恨不壽康叶終吉懿行千秋愈芬苾我作銘
詞風尹姑

金孺人墓表

余外舅爲練塘鄒氏子妻兄弟七人皆以中年夭折行第七
者名伯揆聘金氏未娶年二十四而亡時金孺人才二十二
歲耳截髮奔喪以守節自誓家苦貧居一小樓樓不滿十笏

低打頭人罕見其面亦罕聞其聲日紡木棉花線以自給凡線二兩名一筒子直二十五錢得錢買米半升無竈度風爐一煮而啜之衣百結縷縷然前後無尺布完者夜不能篝燈日入而寢黎明而起蓋五十六年如一日也予年十八補諸生始往見外舅舅率以見孺人易衣而出沉靜端雅進退有節謂夙嫻於禮教不知為孤惇之嫠婦也久之宗人僉謂孺人將老矣不可無子倚恃而親叔伯以早夭故子息絕少乃取從叔之子欽明為後又年始卒年七十有九欽明伺而愿無他能力不足以養母既卒泣而來告曰家貧益甚葬弗克成禮也將聚石灰而葬之不有以表於冢何以示苦節竊願有記焉予讀震川先生集遇里巷孝義貞節之行必志之以文然未有孺人之茹荼集苦如是其窮如是其久者况

余託姻婭之末又嘗親見其人表而出之庶將採於賢守令及鄉之士大夫以埃 國家旌表綽楔之典故敘其梗概又助以錢俾立石於冢上云時乾隆四十七年某月日

法師劉君墓表

劉君名敏字坤培一字伴霞其先上海人遷青浦幼從萬壽道院道士周邠裔受籙弱冠謝婚娶出家邠裔待以嚴厲勞苦之役悉委之君亦奮勉從事閱數年邠裔謂曰人精力日用日強筋骨非練不固智慧非苦不生我用以玉女女初心不退可以語道矣邠裔者本傳宏宣教以西河真人薩守堅為祖以雷霆三五火車靈官為佐驅使風雷神鬼立驗故邠裔有名於時至是則結壇剖券立君為真人二十五代嫡嗣授以祈晴禱雨治邪伐鬼度幽療疾飛符運氣之要君耽思

旁訊日夜演習研鍊凡靈寶妙經玉堂大法金籙黃籙齋儀道法會元道門科範暨於女青天律無不推窮其奧而用之如神乾隆三年六月旱縣令王詔賓戴仁行久禱罔應請君主其事君焚表移文限二十三日未時雨衆疑焉至期日甚皎君披髮跣足行團雲掩日法頃之黑雲升雷電作澍雨大降比雨足日色如故二十五年秋多雨屬君禱之君刺指血上書已而果霽縣令黃潼鯉請求雨亦有應又爲令褚啟宗治妖遣之去令感甚置酒爲謝酒半聞堂外喧雜聲詢之乃責比乙亥丙子兩年逋欠君婉言曰是秋大水水後繼以蟲蟲後繼以癘疫人戶逃亡畧盡今所欠皆無從追索者且江蘇人柔弱不勝大杖重責若留心體恤陰功甚鉅令憬然悟緩其比并貸其追衆頌君能以法事行慈悲方便也性孝友

少時割股以療母疾兩弟貧時時鬻恤勿替友以遺孤託者育其子併嫁其女親戚弗克葬竭力助之有十喪並葬者君結喉露齒僉謂非壽者相而康強逢吉卒以老壽終非修道爲善之應歟君道術聞四方延請者不絕檀施亦衆乃築圩田修傑閣建長橋以渡往來斥餘貲以立精舍有養素堂瀟香亭禮石山房浮青閣諸勝暇則讀書其中中年喜吟詠閒以彈琴作畫名士過訪必留連信宿近代如張伯雨輩擅風雅而疎於道術萬環極輩精道術而詘於風雅君可謂兼之已君歿於五十五年二月初十日年八十有三以六十年閏二月二十日嗣法孫沈某葬君於道院西偏自營之生壙予識君三十餘年及予修縣志設書局於養素堂以是與君益親知其生平益悉故因沈某之請具列事實揭於墓上後有

劉天素之徒撰仙源像傳者當有徵於此矣夫

春融堂集卷六十終

春融堂集卷六十一

青浦 王 昶 德甫

行狀

太子少保協辦大學士刑部尚書諡文勤阿公行狀

曾祖拔都護巴顏 誥贈光祿大夫協辦大學士刑部尚

書曾祖妣貴氏 誥贈一品太夫人

祖雅爾泰 誥贈光祿大夫協辦大學士刑部尚書祖妣

瓜爾佳氏陳氏皆 誥贈一品太夫人

父阿思哈 誥贈光祿大夫協辦大學士刑部尚書妣葛

氏 誥贈一品太夫人

本籍滿洲正藍旗人

公諱阿克敦字冲和姓章佳氏先世居長白山斐郎阿之地

國初來歸公少敏悟年十四爲學生員十六補廩生二十一歲中康熙四十四年乙酉副榜貢生四十七年鄉試中式明年會試成進士授庶吉士五十一年改翰林院編修五十二年擢侍講學士五十五年轉侍讀學士五十六年九月奉使朝鮮十月遷詹事府詹事明年擢內閣學士六十一年以冊封世弟復使朝鮮是年十月擢兵部侍郎十一月兼翰林院掌院學士雍正元年專管掌院學士事二年冊封國王復使朝鮮公容貌偉麗風裁峻整委蛇進退動中禮節外藩臣庶咸愛而敬之三年兼左副都御史旋調禮部左侍郎兼兵部侍郎四年四月調兵部左侍郎兼國子監祭酒尋命署兩廣總督五月攝廣州將軍印五年四月調吏部左侍郎六月署廣東巡撫九月署廣西巡撫公爲總督也時碣石鎮總

兵陳良弼貪黷多取左翼總兵藍奉縱其子累兵皆劾罷之廣東巡撫楊文乾議將高要高明四會三水南海五縣圍基頂衝改築石工次衝改作椿埽計費數十萬擬借庫銀修築且有開捐之請公意不與台文乾專摺陳奏公言五縣圍基俱係土工開竇建牖以時蓄洩每農隙百姓按畝分工加累官私兩便惟江水驟漲則田畝閒或被淹圍基多衝決然水性不猛不必石工椿埽始能抵禦請仍舊法令地方官督民修補江漲則遣員防護圍基可永遠保固無庸改築費帑疏上遂寢文乾議公又言盛世戶口滋繁宜墾荒以足食今墾荒令下民乃裹足不前一由豪強之占奪一由費本之不敷一由吏胥之需索一由土瘠而畏日後之陞科臣謹案勸導之方有五一定疆界以絕爭端一禁需索以寬民力一借

籽種以助農工一緩升科以示憂恤一廣招徠以盡地利庶民知踴躍趨事又令州縣能勸墾十頃以上者捐給籽種牛具者皆予紀錄富厚之室計其墾闢多寡獎賞有差最者給與頂帶是年九月至廣西適思明土司恃險拒捕伐山通道將示進討土司歸誠悔罪西隆州西林縣土司相仇殺不靖撥兵搜捕殲其首惡蒼梧奸民李亞展等聚眾數千督飭弁兵擒獲之復奏言文職力行保甲武職勤於巡防則盜可弭而民可安

上悉嘉納之先是文乾及原任總督孔毓珣皆密奏公袒屬諱盜侵蝕粵海太平二關火耗銀并聽令家人需索暹羅國米船規禮請查審嚴追六年六月有旨著革職交毓珣文乾審奏是時禍將不測會文乾卒

上復遣通政使雷保等前往會訊既雷保等與署巡撫傅泰奏文乾等所參未確惟聽家人收受米船規禮是實下部議坐失察擬斬監候明年奉特旨釋放往河南道工程効力九年

上命撫遠大將軍馬爾賽從阿爾台路征準噶爾授內閣額外學士辦理大將軍印務十一年督札克拜達里克大兵糧餉進噶爾者明瓦刺之裔有四衛拉特一綽羅斯部一都爾伯特部一和碩特部一土爾扈特其輝特部本都爾伯特附庸後因土爾扈特竄歸俄羅斯故別輝特爲一部仍稱四衛拉特厄魯特自烏林台巴勒太師下十二世爲巴圖魯渾台吉有子十二人六曰噶爾丹博碩克圖始自藏中回舊部爲汗孫噶爾丹策凌繼之頗強盛數以其醜擾蒙古喀爾喀部

落及青海西藏 大兵屢破之迄未能靖用兵垂二十餘年
山西甘肅之民憊於供給

上欲諭降之十二年六月自軍中 召還七月 命同侍郎
傅鼐副都統羅密使其地十二月至伊犁河噶爾丹策凌遣
宰桑累吹等來迎問故公等告以

聖上軫念羣生不忍復用兵戈欲使中外一體休養此奉
旨前來之意明日見噶爾丹策凌噶爾丹策凌云我父亡後
內部令我請封號屬下悉編旂分佐領土爾扈特所屬端多
布等大台吉亦令各爲部落管其奴僕我豈能從今欲罷兵
息事更有何言然使者計之何如始能和好永久公云欲議
和好當定疆界定疆界當在阿爾泰山梁始能永久噶爾丹
策凌云汝等何不以杭靄爲界阿爾泰山乃我游牧中間之地

斷不可行公云此事非創自今汝老台吉時已如此特從前
議耳台吉者下於汗一等老台吉噶爾丹策凌之父策妄阿
拉布坦也是日噶爾丹策凌殊不悅旣罷宰桑吹那木喀來
帳公云我昨以阿爾泰山爲界台吉艱然何輕喜易怒如此
吹那木喀云台吉怒不在此部文中令請封號編旂分佐領
台吉實有不悅公云部文如此非抑勒汝行也因汝老台吉
時欲令喀爾喀青海仍行舊制又求科布多烏蘭礦各地地
在阿爾泰山之內皆以不可行之事爲請今此所以報也翌
日公以地圖示噶爾丹策凌噶爾丹策凌云以阿爾泰山梁
爲界皆兩路大臣欲取我游牧因有此說決非出自
聖旨舊時杭靄爲喀爾喀之游牧阿爾泰山爲厄魯特之游
牧以我祖父游牧之地畫出爲界寧不爲俄羅斯回部恥笑

且界在山梁則已據其中矣公云畫定疆界原始於老台吉之請且噶爾丹博碩克圖以前汝游牧或在阿爾泰山若噶爾丹博碩克圖以後汝等未嘗游牧其地已前事豈得復言今以阿爾泰山爲界則喀爾喀厄魯特不相雜處可杜爭端頃之宰桑伍巴什言前和好如此戰爭亦如此今以抑勒強取我土地土地是我身寧可動兵此事決不可公言皇上息兵之旨汝台吉心悅誠服汝何人乃欲動兵夫動兵卽動誰懼汝者伍巴什氣沮未幾吹那木喀來告以伍巴什之語吹那木喀遜謝次日伍巴什來亦把酒自悔所言用兵之失公復告伍巴什云以阿爾泰山爲界厄魯特不得逾阿爾泰山梁喀爾喀不得過科布多其呼孫託回託多爾回作爲閒田但准少許人捕牲我朝與俄羅斯定界其閒亦

有閒置之地最爲得宜若令喀爾喀自呼孫託回閒田之外再加移遠未奉旨不便擅議噶爾丹策凌云使者斤斤若是我當遣吹那木喀同使者入朝求自哲爾革西拉呼蘇祿等處一直向南作爲空閒之地十三年二月乃自伊犁還四月至京師具陳奉使狀

上以公摺及地圖下北路副將軍策凌定議以行間四月署廂藍旂滿洲副都統五月署工部侍郎九月命守護

泰陵乾隆二年閏九月管理

泰陵工部事務三年復命充正使同侍衛旺札爾台吉額默根復使厄魯特議定界七月至伊犁噶爾丹策凌故言我今不願各執各地反生枝節如果和好亦不在定界公等言定界指定某地不可到某地不可逾內外方知遵守否則何

以示衆衆人作何規準噶爾丹策凌云使者因疆界卡倫二
事來否汝處卡倫今設何地公云此皆汝等所知在來路相
對之博爾濟噶爾丹策凌云卡倫設於博爾濟正如建瓴屋
宇之上使我在哈薩克圖設卡瞭望汝處人安否旣和好何
必如是防禦公云卡倫自康熙以來安設以久載在冊籍必
不可撤况每卡不過二三十人此卡倫內又數百里始爲家
卡倫家卡倫內始爲游牧地相隔甚遠噶爾丹策凌云卡倫
當沿邊安置豈可安在我境汝等大國之人逞強致詞譬於
牛鼻上以拳穿孔詎有是理公云某等奉 旨來凡事斟酌
依理豈有逞強且卡倫不過以爲門戶譏察出入無可慮者
何拘執之有噶爾丹策凌又言阿爾泰旣不必閒空我在烏
容齊博東齊游牧是卡倫居我背後何以相安且使臣等曾

言呼孫託回無甚關係今固執不肯恐或進至科布多仍欲
用兵否公告宰桑博霍爾岱云汝台吉雖云在烏容齊博東
齊游牧實在未必也不過因游牧之邊與我卡倫相近恐於
卡倫內伏兵暗算耳

聖主罷兵之 旨昭如日月斷不出無名之師何以多疑噶
爾丹策凌云從前博碩克圖汗時我逾阿爾泰山游牧今不
復蹈前轍我豈狗畜食言乎因白爲摺奏遣其宰桑同來於
是定界息兵之議遂成是年冬授工部右侍郎四年七月轉
左五年三月調刑部轉左四月教習庶吉士閏六月調吏部
轉左六年協辦步軍統領刑名事務七年署正白旗漢軍都
統八年兼鑲藍旗漢軍都統十年兼翰林院掌院學士十一
年間三月擢都察右都御史兼議政處行走五月遷刑部尙

書十三年正月協辦大學士四月罷尋以翰林院奏進

孝賢皇后冊文繙譯錯誤革職交刑部定罪部議大不敬擬斬監候五月得釋 命在內閣學士上行走仍署工部侍郎

閏七月署刑部尚書協辦步軍統領衙門刑名事務又補鑲白旗漢軍都統十月仍兼翰林院掌院學士十二月協辦大學士十四年二月加太子少保七月

上幸木蘭 命留京辦事兼署步軍統領十月 賜紫禁城

騎馬十二月 賜御書協中輔治額十五年七月

上幸河南復 命同履親王和親王留京辦事十九年年七十四月生日 賜贊元錫嘏額及如意 御膳諸物五月

上幸熱河 命同莊親王恂郡王大學士來保辦事如前二十年目疾請假

上許之令太醫院官診視久之未愈屢奏請休遂以原官致仕明年正月二十三日病薨

上遣散秩大臣一人率侍衛十人奠茶酒又給銀一千兩爲辦喪用 賜祭葬如例謚文勤故公惇大樸直遇事英敏受三朝特達之知盡心國是知無不爲而清修介節特立獨行無所附麗撫遠大將軍年羹堯貴盛時欲援公爲助公謝不往也少在詞館大學士張公玉書李公光地陳公廷敬皆愛重之與福文端公敏朱文端公軾高文良公其倬楊文定公名時爲執友又與徐壇長用錫成綱齋文王虛舟澍蔣湘帆衡爲文字交生平先以文學被 寵遇充河南鄉試副考官順天鄉試正考官者各一充會試正考官者一充繙譯會試副考官者一鄉試副考官者二充文武 殿試讀卷官者七

充 經筵講官者三充 日講起居注官者四充
聖祖仁皇帝實錄館副總裁又充 四朝國史館 五朝國
史館副總裁者各一又充 國史館總裁又充會典館總裁
副總裁者各一又充治河方畧館副總裁又充八旗通志館
副總裁又充一統志館副總裁又充清漢篆文館副總裁鴻
裁藻鑑天下駿偉之士多在門下而總領書局懷鉛舐墨承
其黠竄者無不各恢其意其掌翰林也務在愛養人材戒史
官毋得驚奔走矜才藻必以立品礪行究心經濟爲先居刑
部十餘年持以平恕行以易簡準以經義每奏讞未嘗有所
逢迎瞻顧故當世一以爲儒宗一以爲偉人長德而公未嘗
欲以文詞自表著艱難盤錯不惜以身試其閒當厄魯特強
盛時跳梁倔強久患邊境公直入其部落奉辭執理反覆詰

難時觸其酋長之怒而斷斷不屈卒能讐其氣而服其心息
兵定議使邊氓獲有寧宇厥功爲最鉅公先娶宜爾根覺羅
氏繼配那拉氏皆 封一品夫人子一卽今大學士誠謀英
勇公阿桂孫三長阿弛斯次阿斯達早沒次阿彌達葬京師
左安門外之楊柳坊所著撰有德蔭堂集十六卷公立 朝
四十餘年造膝之談焚草之疏史宥所秘世莫能知惟昶鄉
會試座主皆公乙丑所取士 殿試公爲讀卷官又出公門
知公生平事實最詳謹撮其大節偉行敘次於篇庶有徵於
太史乾隆四十三年正月 賜進士出身通政司副使門下
晚生王昶謹狀

太子太保東閣大學士梁文蔚公行狀

曾祖萬鍾 誥贈光祿大夫協辦大學士吏部尚書

祖國儀 誥贈光祿大夫協辦大學士吏部尚書
父文濂歲貢生諸暨縣學訓導 誥封光祿大夫協辦大
學士吏部尚書

本籍浙江杭州府錢塘縣人

公諱詩正字養仲又字薌林少有異稟五歲始能言十一歲
能時文十九歲入錢塘縣學與兄啓心有二難之目二十五
歲偕同學杭君世駿陳君兆崙等六人聯文社有質韋集行
世二十七歲從院長萬太史經讀書敷文書院雍正四年丙
午鄉試中式八年庚戌會試成進士 殿試以周壽榜一甲
第三名及第授編修九年充一統志館纂修十年充山東鄉
試正考官十一年充會試同考官十二年 召赴西苑試詩
選入 上書房侍

今上暨 誠親王 和親王講讀公以舊學受知 兩朝蓋
助於此九月以原銜充 日講起居注官十月授侍讀十三
年六月授侍講學士七月以凌太夫人病乞假歸是時
世宗憲皇帝賓天

今上皇帝卽位而公亦丁憂事聞 賞銀五百兩治喪乾隆
元年 詔赴入直及抵京 賜俸照現任學士支給又兼直
懋勤殿與同年顧侍講成天恭校 御製樂善堂全集九
月 賜第于南城珠市街初

上在潛邸時

憲皇帝以三藏聖教卷帙浩繁且支那撰述有未編入令
上同莊親王校理未竟厥緒至二年三月 勅和親王同公
詳審進呈逾年而書成三年五月積雨初霽 召公及內廷

大學士暨翰林等登 御舟遊賞遍歷瑤臺蓬島六月轉侍
 讀學士復充 日講起居注官十月充順天武鄉試正考官
 十二月授內閣學士兼禮部侍郎充 經筵講官四年正月
 授刑部右侍郎公以初貳秋官刑名未習日取律例講肄之
 有疑義輒與曹郎相質期于貫通五月調戶部右侍郎錢法
 因循日久弊叢生公察其所以以次釐定積弊一清是年春
 兄啓心成進士改庶吉士五年閏六月訓導公壽七十 賜
 傳經介社額又製五言律詩 賜之十一月轉戶部左侍郎
 六年三月充 皇清文穎館副總裁尋奏八旗閒散人丁宜
 分置邊屯以資生產綠旗增設兵丁宜量停募補以減冗額
 皆 允行又 命仍兼錢法事時有主使匹人控告監督受
 賄者詞侵公奉 旨派王大臣同戶刑二部會鞫事誣得釋

七月扈從木蘭十一月兼吏部右侍郎恭遇

皇太后五旬萬壽 命與戶部侍郎三和承辦 內廷慶典

七年四月充 殿試讀卷官一甲三名爲仁和金君性陽湖

楊君述曾陽湖湯君大紳再 命閱進士朝考卷取朱佩蓮

等三十六人是年兼 御書館又 命纂叶韻彙輯一書兄

啓心散館授職編修八年正月

上御重華宮 召大學士翰林等 賜宴聯句 勅公書以

勒石七月

上謁

祖陵公隨行至 盛京

上陞殿大宴 命進榻前手 賜以卮酒入山海關

上登登海樓觀海獨 召刑部尚書張公照暨公聯句尋編

秘殿珠林及石渠寶笈亦公借張公任之九年 賜清勤堂
 額初冬扈 駕盤山入 宮門許乘騎而行旋 蹕適重葺
 翰林院成 車駕臨幸送大學士堂院事鄂公爾泰張公廷
 玉進署時大學士九卿翰詹諸臣畢集 錫宴賦詩用唐臣
 張說麗正書院賜食應制詩字分韻 賞賚有差公以侍郎
 賞與尙書將奉 特旨也十一月 命選唐宋大家詩醇十
 年五月授戶部尙書又 命闈進士朝考卷取邵齊烈等四
 十一人七月扈 駕幸多倫諾爾十一年 建福宮落成
 命公作賦紀之八月 召大學士九卿翰林詹事諸臣赴瀛
 臺 賜宴和 御製詩四章又仿柏梁體賦詩又用唐臣李
 嶠甘露殿應制詩字分韻宴畢
 上憩流杯亭 命公等雜坐水石間分牋聯句既 諭登舟

遊覽如賞花釣魚故事九月扈

駕謁

秦陵旋詣五臺爲

皇太后祝釐經正定 命觀衆春園雪浪石舊跡并和

上擬蘇軾聚星堂體詩十二年充續文獻通考館總裁七月

復扈 駕木蘭十三年三月扈 蹕幸山東先詣曲阜謁

孔林嗣祭嶽廟登泰岱

上以山徑險仄 諭公不必隨而沿嶺分駐侍衛若署郵然
 有 旨遞傳上下前此所未有也旋奉 命闈迴避卷得福

建李君宗文四月調兵部尙書 命闈進士朝考卷取方懋

祿等三十八人十四年二月金川報捷加太子少師八月

上以經畧大將軍禮無區別宜定儀注公稽攷舊典參以時

宜自禱祭啓行迄凱旋告

廟臚列進呈載入會典十一月吏部尚書陳公大受病久奉
 旨兼管吏部尚書 賜宣贊樞衡額十二月兼翰林院掌
 院學士越數日奉 旨協辦大學士是秋 命偕汪公由敦
 纂西清古鑑十五年正月授吏部尚書仍辦閣務頃之教習
 庶吉士五月御史歐堪善奏公徇庇營私各款
 上召軍機大臣及掌院學士阿公克敦吏部尚書達公爾黨
 阿暨公堪善等於 勤政殿 親加訊問事白不復置議八
 月扈 巡中州經趙州柏林寺有吳道子文武水畫壁時吏
 部侍郎彭公啓豐亦扈從 命同為聯句進呈會御史儲麟
 趾奏四川學政朱荃匿喪
 上召問奏對不稱 旨罷掌院學士吏部察議疏上奉 旨
 革職畱任十二月 恩賜公子敦書舉人蔭生分部學習明

年

上南巡公請扈從歸里為訓導公慶八十壽辰
 上先給一品誥封以示 恩寵十六年正月從 南巡啓行
 次維揚公給假先歸奉訓導公迎 駕於吳江 賜克食及
 貂皮緞疋又 賜湖山養福台階愛日二額 御製五言詩
 一律時 御試兩浙士子詩賦 命公及汪公由敦閱卷取
 謝君埔等六人是年又扈從木蘭十一月恭逢
 皇太后六旬萬壽慶 賜如意朝珠荷包朝衣諸物他臣不
 得與也歲小除蒙 賜白銀五百兩十七年訓導公目失明
 乘 召見以歸養請 御書身依東壁圖書府家在西湖山
 水間一聯慰之六月復請奉 旨協辦大學士吏部尚書梁
 詩正因父梁文濂現年八十一歲奏請回籍終養梁文濂家

居頤壽朕已疊次加恩梁詩正典領銓政供職內廷正資宣力但父子至情年逾大耋理應承歡膝下以遂孝思著准所請回籍侍養時

上將秋蒐未忍遽還也十月陛辭 賜御製五言律并貂皮大緞又 賜訓導公如意人褱貂皮等物且 諭云二三年後南巡汝接駕至揚州君臣復得相見矣公感激涕泗而出其冬抵家十八年 命與沈公德潛合修西湖志纂十九年上知公舊有塞上雜詠 命錄以進明年西師奏凱上平定準夷頌皆叨 厚賚二十二年再 幸江浙公在吳江平橋迎 御舫奉 諭云梁詩正侍養在籍安靜可嘉其照品級在家食俸以昭眷念舊臣至意再 賜御書萊衣畫永扁額三月 駕莅江寧試上下江士子詩賦 命公及總督尹公

浙江學政寶公光鼎閱卷取昶等七人尋令回浙侍養

五月

上寄御製詩一百八十餘首 命和進之二十三年四月訓導公卒九月奉

上諭梁詩正丁憂已逾百日工部尙書員缺一時不得其人卽著來京署理公奏請俟窀穸事畢再北上 許之時公之兄編修君亦卒明年正月並營葬於葛嶺是月又奉 旨調署兵部尙書於是入都 賜紫禁城騎馬復 命工部侍郎三和於澄懷園度地建屋俾就近直宿如初八月充順天鄉試正考官二十五年四月充會試總磨勘官五月偕軍機大臣閱庶吉士散館卷取江西蔣君士銓第一七月服闋奉 旨教習庶吉士八月

上五十萬壽 命赴熱河入宴九月實授兵部尙書十二月
蔣公溥病奉 旨署掌院學士兼續文獻通考館總裁二十
六年正月初二日

上御武成殿宴賚將軍兆公惠等公與焉二月 駕幸五臺
公從四月充 殿試讀卷官一甲三名爲陝西韓城王君杰
仁和胡君高望陽湖趙君翼陝西地鄰邊塞 本朝未有以
一甲入選者時值西域寧救而狀元爲西人

上大悅再 命闈進士朝考卷未幾蔣公病薨以劉公統勳
授大學士吏部尙書協辦大學士兩缺令公補授仍管掌院
學士七月 駕幸木蘭 命同王大臣畱京辦事十一月恭
遇

皇太后七旬慶典例進 御製表文 命公擬撰進呈奉

皇太后懿旨 賜緞疋荷包又 賜朝珠如意各物是月十
一日恭上

皇太后徽號冊寶典禮隆重公同協辦大學士兆公惠主之
周旋罄折從容中度爲觀禮者所稱奉

懿旨賞賚較廷臣有加二十七年充順天鄉試正考官二十
八年六月補授東閣大學士仍領前職九月 賜第於內城
勾闌衢術十月晉太子太傅時公子敦書出爲貴州知府俸
滿當來京引 見奏請畱部得 旨仍以戶部郎中補用未
至京而公已於十一月十四日無疾而薨年六十有七
上聞震悼遣 皇五子率侍衛十人親詣奠醑 賜內庫銀
一千兩治喪又以寓次乏人 特派內務府司官一員往理
喪事 晉贈太保又 命入祀賢良祠謚文莊公樞將歸

上復諭沿途文武官弁在二十里內者著俱赴舟次弔奠並遣人護送俾得穩抵故里以示體卹世益榮之公初配孫氏再配包氏三配徐氏俱封一品夫人子長同書出爲編修君後公乞養時適會試下第特旨賜一體殿試選庶吉士今官翰林院編修以文詞名世次敦書由恩賜蔭生歷戶部郎中出爲貴州遵義府知府改戶部郎中孫男三履繩玉繩應繩公由詞臣入內廷迴翔禁近及扈從巡幸常在屬車豹尾閒國家鉅製咸出其手所著有矢音集五卷已刊行餘藏於家公雅不欲以文人自居惇龐純篤謹於內行以閣臣就養家居問安視膳納屢撰杖無不躬親者公在朝編修君在家家事無巨細一聽處分兢兢胖胖不懈滋恭如史稱萬石君雖鄒魯篤行無以過之性儉素衣必

數澣居處飲食嚮於寒士貴郎墨吏不敢因緣造請每下直雙扉晝掩閒庭闕寂筦司農者九載不名一錢常署所居爲味初齋示不望其舊旣歸西湖構古懷書屋不繫舟共五楹以供燕息又於葛嶺增營新阿建祠宇卽清隱菴而稍廓之丙舍數間樽櫨無飾人不知爲宰執之塋也自以受知兩朝天下想望丰采治事持大體必有裨民生有益國計而折衷掌故綜覈利弊不肯以曹事勢如稍自暇逸亦不肯曲徇同官意旨雖纂撰書籍亦再三披繹期於美善是以游被寵遇錫予便蕃廷臣無出其右屢爲訐者所愬卒草能少閒也吏部掌銓政爲六官長而掌院所屬係文學侍從之臣內閣職典絲綸出納王命皆京僚極清要地公兼領數年錢塘王公際華戲謂曰公可謂三清居士矣新建裘公

曰修笑曰兼以 上書房 南書房則五清也其為同官傾慕如此公常言往在 上書房為

今上作擘窠大字適

憲皇帝駕至諸臣鵠立以俟

憲皇帝命作書墨漬於袖又 命

今上曳之今弄此衣三十年矣他時服以就木庶存沒志

君恩也卒如其言嗚呼昶侍公於味初齋者三年竊見公

裁清整夙夜寅畏造膝之言沃心之論未嘗稍有宣露而

謨嘉猷上於 黼扆藏在史箴者亦往往自焚其草故

其 寵眷稠疊 恩禮始終條件而縷記之具見 然

良

主臣一德而公所以忠勤篤斐亦可有徵於

十九年甲申十月 賜進士出身刑部山西司主事門

補王昶謹狀

王以信狀

中

山西河東

